

# **Jesocristopa Huanodsa itedsejemacca ima ahuato inanajaro Apocalipsis**

Jesocca dodosse Huano jadahi tocajadsapa dsama bedeni onini Patimo passo imenidsa huittidsacossajarodsa madijari. Aja Romanodenicca tamine Jesocristo tahimaridsa jipera tadsa Huano dama inadsa Patimohuaji dosse inajari. Nahi Patimohuaji madijaripa pina toponi cocorodsa huedsajarissa najari. Nahidsa madidsapa pina pocca huadassa nadsa Dio Corime itedsejemacca ima pohuadsa ahuato inanajaro. Nadsapa Huano pohua qqui tajaricca dsodo inajaro.

Ajijaro imapi Jesocristodsa jehe quinajari-denidsa dsodo inajaro. Motapa Romanodenicca nanajidso toquejenajari. Motapa tojicajari, mota tocassiejerajarideni ajijaro ima mittamanadsapa poccadeni jeheniji todacorani nanijine pohuadenidsa dsodo inajaro. Ia naqui Romanodenicca nanajidso iquejena-jeraraha ajijaro ima imittadsapi icca jeheniji todacorani nanijine pajirani.

Ajijaro imapi Djojine Huanodsa ahuato inajarocca imittani. Jeso ccanibote nadsapa ajijaro dsamadsa tojaridsa-ponijinecca ima dsodo inajaro. Dsama jicanicca naqui ima dsodo inajaro.

Huano qqui tajaripa bica tanicca, oppina tanicca, jidsa tanicca, ijabojo nanicca. Pohua qqui tajari huapimapi jidsa taraha ima deni tojanicca cajini.

Ajijaro imadsapi Jesodsa: Edede Bedi, najari. Pohuadsa nama najaripa tahide jiodeni poccadeni imasiri manaconi edede bedi Diodsa da da quiquinapojari. Jesopa huapimacca imasiri manaconi tojadsa pohuadsa: Edede Bedi, nanaja najari Dio.

Ajijaro imadsapi Diocca huadi Satanapa ajamani tojahi ahuato tajari. Jesona deni tojajari. Pohuana huapimacca tamine tojadsa memecca namicca dossede tojajari.

*Jesocristojine Huanodsa jidapanacca ima ahuato, nidsa dsotodecca ima ahuato inanajaro*

<sup>1</sup> Diona Jesocristodsa itedsejemacca ima ahuato inanapojaro. Manaco Jesocristopa pocca medsedenidsa ahuato inananiijine. Ajijaro ima iadsa ahuato inananiijine Jesocristo pocca dodosse memehujicca dosse inaronadsapa ohuadsa huati tajari. Pohujine qqui onajaro. Ohuapi Huano, Jesocristocca medse ojani. <sup>2</sup> Aji huapima ohua qqui onajaropi pajissa huati onajaro. Aji dsodo onajaropi pajissa Dio Atti Jesocristojine ohuadsa ahuato inanajaro.

<sup>3</sup> Ajijaro ima Diojine ahuato tajarocca madija huapima mittamanahijine hua hua najaripa huatidsehema madihitohui. Mittamanajarideni naco aji dsodo naniccassa inanamanajarodeni naco huatidsehema madimanahitohui. Diojine ahuato inanajaropi tohuajirajonani.

*Huanopa Jesocristodsa quequeriqquimana najari 7 najarodsa dsodo inajaro*

<sup>4</sup> Ohuapi Huano. Ajijaro occa imapi aji Asiahuajicca odsa panani 7 nanihuaji Jesocristo tahimaridsa titiqueriqquimana najarodenidsa dsodo onajaro. Diopa madihi. Nadsama madipojari. Nidsa ccajonahitohui. Ccajonadsapa tiadenidsa ima bicani inanaridsana. Pocca jonehe inanaridsana, onajaro. Dio Pohua dosse dosse nanaja nahicca huihuittari tadsajanima Pohua Corime 7 quinaha domo huajarideni naco tiadenidsa ima bicani inanaridsamanana. Poccadeni jonehe tiadenidsa inanaridsamanana, onajaro. <sup>5</sup> Jesocristo naco tiadenidsa najarossa inanaridsana, onajaro. Puhuapa Dio Atti nahato tadsa pajissara huati huati tajari. Puhuana tahide nahatonipojari. Puhuapa dsama huapimacca tamine deni tojajari. Huapimadsa dosse dosse najari. Jesocristo iadsa huati huana tajari. Imasiridsa imadiraha pohua emene toccajarojine icca imasiri inajicaridsajaro. <sup>6</sup> Puhujine pocca cacahuanijidsa iquejenajaro. Puhujine pocca Abi Diodsa idsepe ijijaro. Diodsa dada toqquimade, huahuati toqquimade iquejenajaro. Nadsapi Jesocristodsa ehetidse nana. ¡Puhuapa bica tahi, deni tojahi! Pocca nahatonaja huapima ecahuadsanaponijine pocca deni tojehe pajiranissa tajaro. Apaja puhuapa nama dsanapohuitohui, inana, onajaro. Pajissa nema nana.

<sup>7</sup> ¡Ticattomama canaji!

Jesocristo meme essenima ccaronahi qqui tiquinahitohui.

Madija huapima qqui toquinahitohui.

Aja Jesocristo pohua nanadsoqquededeni naco  
qqui toquinahitohui.

Dsama huapimacca madijapa pohuatohui oji oji  
quinahitohui.

Jehe, pajissa nema nana.

<sup>8</sup> Ia Medsede Dio Attipa: —Ohuapi Dio Da-  
corabote. Tahidedsama omadipojaroa aji ji-  
caqquni bacco onanitohui -nade ia Medsede  
attipa. Pahuapa madihi. Nadsama madipojari.  
Nidsa ccajonahitohui.

### *Huanodsa Jesocristo ahuatojari*

<sup>9</sup> Ohuapi Huano timecotedeni ojaní. Titedseje-  
deni Diocca cacahuehedsa iquejenajaro. Madija  
Dio Attidsa jiperaqquri najaripa ia totonajidso-  
baqqumana najari. Naraha Jesocristojinepi ima  
inahananijine ipajirani.

Ohuapi passo nocconidsa dsama huittidsacos-  
sani Patimodsa ohua inebomanadsapi pina to-  
poni cocorodsa ohuedsajarossa najaro. Dio  
Atti maride ojaridsadsa, Jesocristo tahimari  
ohuaccora-ridsadsapi Pahuadsa jiperaqquri na-  
jaridenijine todsepe ojajaro. <sup>10</sup> Ia Medsedecca  
huada domingodsa Dio Corimecca dacorehe  
ohuadsa ahuatomadsa mohuini dacorehema  
ohuedehuaji omittajaro. Atti mohui pina jei-  
jei mohui dacorajarissa nadsa omittajaro. <sup>11</sup> Atti  
ajama najari: —Ajijaro huapima tiadsa nohue  
onajaropi papeodsa dsodo taji. Aji dsama  
Asiahuaajicca Jesocristodsa quequeriqquimana  
nahi 7 naridsajarodsa ima dosse tinaridsani-  
jine. Odsa panani Epesohuaji, Esmirnahuaji,

Peocamohuaji, Tiatirahuaji, Saradisiohuaji, Piradeopiahuaji, Laodiseahuaji dosse tinaridsaji -nade atti mohui tadsa. <sup>12</sup> ¿Nejecojarì atti? onadsa piti onahuajanidsa qqui onanaja jojororo pinine dsibehi tajari orocca 7 quinaha qqui onajari. <sup>13</sup> Qqui onanaja jojororo pinine cacahueri nahi nocconidsa pina madija bedissa naha hua canajari. Pocca etero dequerajaro amoridsa bacco tajaro. Pohua biji mete ssoossoque dsibehi tajaro pina orossa najaro. <sup>14</sup> Tati conepi nopo tajaro. Pina edede bedi nopohui conessa, pina ssono tetepinicca ssirini noponissa najaro. Pohua noccopa pina dsippo jororonissa najaro. <sup>15</sup> Pohua amori naqui dsibehi tajaro. Pina ccara tahicca onini bronco dsippo ppoconidsa tojadarijaro, dsotode jiti nadsa todsibehijarossa najaro. Pohua atti dacorajaro, pina passo dacorehema ssahaha canajarossa najaro. <sup>16</sup> Pohua dsepe nahatoniccadsa abadsico bedi 7 canaha cajijari. Pohua ajaridsapi jadsirecca massito cajadsireqquimera najarossa najaro qquenajaro. Pano naco dsibehi tajari pina maji itetepidsa ssiejene dacorajarissa najari.

<sup>17</sup> Qqui onadsapa pina ohuatiajarossa najaro. Pohua amorihuaji ohuedimadsa oponajaro. Naraha pohua dsepe nahatoniccadsa ohua bara nadsa huati tajari: —Ticappinajeraji. Ohuapi tahidedsama omadipojaroa aji jicaquini bacco onanitoahui -nade. <sup>18</sup> —Ohuapi camitta onani. Odsoqueporaha onahatonidsapi omadi-dsanaponitoahui. Ohuapi pipico ocajini. Najaripa dsoqquemana-pojarideni corime cacahuabaqquihicca pipico -nade Jesocrìsto

ohuadsa. <sup>19</sup> Nadsapa ohua cadossejari: — Aji huapima qqui tinajarrocca dsodo taji. Aji jidapana tojaridsajarrocca dsodo, nidsa dsotode tojanijinecca dsodo taji. <sup>20</sup> Aja abadsico bedi 7 canaha odsepe nahatoniccadsa qqui tinajari, jojororo pinine orocca 7 naha qqui tinajaricca ima ahuatora taraha imapi ajima najaro: Aja abadsico bedi 7 canajaripa otahimaridsa quequeriqquimana najari 7 najaro cacahuade toquejenajaridenicca ima. Aja jojororo pinine 7 najari naco otahimaridsa quequeriqquimana najari 7 najaro –nade Jeso ohuadsa.

## 2

*Odsa panani Epesocca Jesocristodsa quequeriqquimana najaridenidsa Jesocristo pohua atti dosse inajaro*

<sup>1</sup> Jesocristo ohuadsa huati dsanapojari: — Epesohuaji otahimaridsa quequeriqquimana najari cacahuadedsa dsodo taji –nade. —Ohuapi odsepe nahatoniccadsa abadsico bedi 7 canaha ocajijaro. Jojororo pinine orocca 7 naha cacahueri naridsajari qquide naqui occaridsajaro, nahi taji, onajaro. <sup>2</sup> Ticcadeni madie ohuadsa ahuato taridsajaro. Dio tiadeni tocadossebaqquijaridsa tidsepedeni ijimanadsapi dacoco tijiradsa tidsepedeni ijimanajaro. Otahimaridsara disseraqquri tiquinajaro. Ticcadeni ima onihi naqui nahato onani. Najaropi tabaccorehe inanamanajarodeni tettajobaqquimanajari. Madija mota maidsamanadsa attidenipa: “Tapi Jesocristocca dodosse tabaqqui

iquejenani” quinaraha poccadeni ima nattome tiquinadsapi tijinedeni poccadeni maidsehe ahurato tinanamanajaro. <sup>3</sup> Otahimari tinebomananijine madija tiadeni tonajidso-baqquimanaraha tinebomana-jerani. Ticcadeni ima occa marinajassa nanijine jahohoraqqiri tiquinajaropaji.

<sup>4</sup> —Naraha ticcadeni ima motapi jipera onani. Tahidepi ohuadsa tetideni huanagguiri nadsa ohuadsa tetidsemaneri naporaha dsotodepi ticcadeni huatidsehe ajimani tojani. <sup>5</sup> Tibodideni huatoma-manaji. Aji ohuadsa tetidsemanapojarrocca ima tetideni ajimamana tejeraji. Tibodideni cacajiqquimera-pomaji. Ohuadsa tetideni huanagguiri napomaji. Nema tiquinejeradsapi nanihuaji occadsa ticcadeni jojororo pinine odinihitohui. <sup>6</sup> Naraha ticcadeni ima onihipi bica tani. Nicolaitadenicca ima tabaccora tanicadsa jiperaqqiri tiquinani. Ohua naqui Nicolaitadenicca imadsa jipera onani.

<sup>7</sup> —Dio Corimepa otahimaridsa quequeriqquimana najaridenidsa huati huati tajari. Aji huapima titiqueriqquiridsa nanihuaji teribodeni ticajimanadsapi Pohua Atti timittamananissa taji, onajaro. Aji occa dacorehema timadimanadsa ohuadsa jehe tiquinajaro tinebomana-jeradsapi nidsa Diocca dsama bicanihuaji ahua bono camittehecca tijipamananijine tiadenidsa da onaridsahitohui —nade Jeso.

*Odsa panani Esmirnacca Jesocristodsa quequeriqquimana najaridenidsa Jesocristo pohua atti dosse inajaro*

8 Jesocristo ohuadsa huati dsanapojari: — Esmirnahuaaji otahimaridsa quequeriqquimana najari cacahuadedsa dsodo taji -nade. — Ohuapi tahidedsama omadipojaroa aji jicaqquni bacco onanitohui. Odsqqqueraha onahatonid-sapi omadijaro. 9 Aji ohuapi nemaneha nahato onani. Najidsohuedsa timadimanani nahato onani. Todsepetaji ticappiramanehe timadimanajaro naqui nahato onani. Naraha pajissa tiadenipi Diocca daniji bicabote onihi onihi nehe ticajimanani. Tiadenidsa jiperaqquri najarideni tiadeni tototamasso-baqquimana najari nahato onani. Najarideni attidenipa: “Iapi jodiodeni, Diocca madija iquejenajaro” quiquinanaraha najaropi pajissa jerani. Ima pajissapi pohuadenipa Satanacca medse toquejenajari. 10 Nidsa otahimari acconi ocasserani temanadsapi ticappinamana tejerana. Satanajine tiadeni mota pamahapa toponi cocorodsa toquejenahitohui. Nama nahijinepa tiadeni huapima tiadeni nattome tabaqquihitohui. Huada 10 nehe pohuajine ocasserani temanaraha otahimaripi tinebomana tejeraji. Disseraqquri tidsanapomanaji. Otahimari tinebomana-jeradsa tidsoqquemanani bacco tiquinadsapi tiadenidsa occa camittehe jiquejeranicca da onanitohui.

11 —Dio Corimepa otahimaridsa quequeriqquimana najaridenidsa huati huati tajari. Aji huapima titiqueriqquiridsa nanihuaji teribodeni ticajimanadsapi Pohua Atti timittamananissa taji, onajaro. Aji occa dacorehema timadimanadsa ohuadsa jehe tiquinajaro tinebomana-jeradsapi

tidsoqquemanaraha dsoqquehe dsotodeccapi  
tinahanamana-jeranitohui, onajaro -nade Jeso.

*Odsa panani Peocamocca Jesocristodsa que-  
queriqquimana najaridenidsa Jesocristo pohua  
atti dosse inajaro*

<sup>12</sup> Jesocristo ohuadsa huati dsanapojari: —  
Peocamohuaji otahimaridsa quequeriqquimana  
najari cacahuadedsa dsodo taji -nade. —  
Ohuapi jadsirecca massito cajadsireqquimera  
najaro ocajini. <sup>13</sup> Aji ohuapi ticcadeni madie ne-  
manehe nahato onani. Timadimananihuajipi Sa-  
tanacca ima dacoraraha ohua onipi tinebomana-  
jerajaro. Ohuadsa jehe nahissa tajari oni Antipas  
tinoridenidsa inanadsoqque-manaraha ohuadsa  
jehe tiquinajaropi tinebomana-jerani. Nahi  
tiadenihuajipa Satana dosse dosse naraha ohua  
tinebomana-jerani.

<sup>14</sup> —Naraha ticcadeni ima motapi jipera onani.  
Tiadenihuaji madija motapa maittaccadsama  
madijari Baramicca marinaja nebomana-jarahi.  
Aja Baramipa Isaraerideni imasiri inanamanani-  
jine dsama Moabacca tamine Baraca inahatta-  
jari. Pocca marinajapi ajima napojaro: Siba  
nahatonidsa da tahicca bani Isaraerideni jipa-  
manahijine oppinera tani. Huananehe inana-  
mananijine naqui oppinera tani, najari.

<sup>15</sup> —Nahidsa naco madija mota Nico-  
laitadenicca marinaja nebomanahijine  
jiperaqquri najari. <sup>16</sup> Tibodideni  
tecajiqquimeraji, najaro ima pamehe tiadenidsa  
nohueranijine. Ticcadeni ima tecajiqquimera-  
jeradsapi tiadenihuaji occanitohui. Baramicca,

Nicolaitacca marinaja cajimanajarideni ocahadibaqquihitohui. Ohuajaridsa ohuatti qquenajaro pina jadsirecca massitossa najaro pohuadenidsa ssonarinitohui.

17 —Dio Corimepa otahimaridsa quequeriqquimana najaridenidsa huati huati tajari. Aji huapima titiqueriqquiridsa nanihuaji teribodeni ticajimanadsapi Pohua Atti timittamananissa taji, onajaro. Aji occa dacorehema timadimanadsa ohuadsa jehe tiquinajaro tinebomana-jeradsapi tiadenidsa pan oni mana memehuaji tonajimahicca tijipamananijine da onaridsahitohui. Siba noponi naqui tiadenidsa da onaridsanitohui. Najaro sibadsapi tiadeni oni dsati dsodo nani cajiridsani. Najaro tiadeni onipi tiadenira nahatoqquri tiquinajaro -nade Jeso.

*Odsa panani Tiatiracca Jesocristodsa quequeriqquimana najaridenidsa Jesocristo pohua atti dosse inajaro*

18 Jesocristo ohuadsa huati dsanapojari: —Tiatirahuaji otahimaridsa quequeriqquimana najari cacahuadedsa dsodo taji -nade. —Ohuapi Dio Bedi ojani. Onoccopi pina dsippo jororonissa najaro. Ohuamori naqui dsibehi tajaro. Pina ccarara onini bronce jiti nani todsibehijarossa najaro. 19 Ima huapima tinanamanajaro naqui nahato onani. Otohui tetideni huanacquiri nadsa ohuadsa tetidsemanani nahato onani. Ticadeni jeheniji dacorani nahato onani. Ohuadsa tidsepedeni ihijimana najaro. Najo taniccadsa iboraqquri tiquinani nahato onani. Jidapapi

denima nema tidsanapomanani naqui nahato onani.

<sup>20</sup> —Naraha ticcadeni ima motapi jipera onani. Najaropi amoneje Jesabeocca ima. Poni attinipi: “Ohuapi Dio Atti cacomerabote” naraha maidsajaro. Ponicca marinajajine occa madija huananehedsa toquejenaridsajari. Ponijine siba nahatonidsa da tahicca bani naco jijipamana najari. <sup>21</sup> Ohuapi poni bodini cacajiqquimeranijine tohuini omadi omadi dsanaporaha bodini cacajiqquimeranijinepi jipera tajaro. Ponicca huananehe nebonijine jipera tajaro. <sup>22-23</sup> Naraha jidapapi ojine coma tehe porinitohui. Ponicca ejedeni naco onajicahitohui. Nidsa poni ajadedeni naco bodideni cacajiqquimera-jaradsa, poccadeni imasiri nebomana-jaradsapa pohuadeni naco comaqquri nadsa ocasserani ahuamanahitohui. Nadsama otahimaridsa quequeriqquimana najari huapima bodideni huatoma-manadsapa occa ima nahatoqquri nahijine. Ohuapi madija attideni nahato, bodidenicca ima nahato onajaro. Imasiri tinanamanajaro manaconi tiadenidsa onananitohui.

<sup>24</sup> —Naraha Tiatirahuajicca tiadeni mota aji Jesabeocca marinajadsa tiquejena-jeradsapi, aja “Satanacca marinaja deni tojanicca ahuatora tani” quiquinanajaridsa tiquejena-jeradsa naqui tiadenidsa ima oppina tanicca huati onejeraraha ima ojariena huati onajaro. <sup>25</sup> Ticcadeni ima bicani tecahuamana-dsanapona, occanipomani-huaji bacco tiquinanijine. <sup>26</sup> Aji occa dacorehema timadimanadsa, ohuadsa jehe tiquina-

jaro tinebomana-jeradsa naqui, aji ohua jipa onanicca tidsepedeni ijimanadsapi nema tid-sanapomanajaroa occanini bacco tiquinanito-hui. Nadsapi dsama onihi onihi naridsajarocca madija dossede tiquejenanijine tiadenidsa dacorehe onananitohui. <sup>27</sup> Maittaccadsama occa Abipa ohuadsa: “Dsama nemanehedsa madirid-samanajaridenicca tamine tijanitohui. Pina tamine dacorabote pocca dsodsojo ccanajabotedsa dsipa idadsa bararijarossa tinanabaqquihitohui” napode ohuadsa. <sup>28</sup> Naraha cacahuehe najarossa najaro tiadenidsa naqui onanaridsadsapi dsama huapima tecahuaridsa-mananitohui. Tiadenidsa ima onihi bica tanicca naqui onanaridsanitohui. Madija huapima ticcadeni deni tojehe qqui toquinahitohui. Pina ssiajajonanicca abadsico bedi ssiejene dacorajarissa tiquinanitohui.

<sup>29</sup> —Dio Corimepa otahimaridsa quequeriqquimana najaridenidsa huati huati tajari. Aji huapima titiqueriqquiridsa nanihuaji teribodeni ticajimanadsapi Pohua Atti timittamananissa taji -nade Jeso.

### 3

*Odsa panani Saradisiocca Jesocristodsa quequeriqquimana najaridenidsa Jesocristo pohua atti dosse inajaro*

<sup>1</sup> Jesocristo ohuadsa huati dsanapojari: — Saradisiohuaji otahimaridsa quequeriqquimana najari cacahuadedsa dsodo taji -nade. — Aji ohuapi Dio Corime 7 naha ocaji, abadsico bedi 7 canaha ocaji najaro. Ohuatti tiadenidsa

ajima onajaro: Ticcadeni ima huapima nahato onani. Madija ohuahadeni ticcadeni madie qqui toquinadsa attidenipa: “Jesocristo tahimaridsa huahuatidsemana nahi” quinaraha ohuapi pajissa nahato onani: Ohuadsa tetideni ajimamanabote nani. Pina tecotajarossa najaro. <sup>2</sup> ¡Jari, tinoccodeni ssire-re napomaji! Titiqueriqqui nanicca ima jicabote nani. Tidacoramanani napomaji. Ticcadeni madiacca ima nahato onani: Occa Abi Diodsa tidsepedeni ijijaropi tijinedeni toccanissa tejerani.

<sup>3</sup> —Nadsama tiadenipi tibodideni huatomananissa taji. Aji occa marinaja tiadeni mari tocanabaqquipojarissa tinanamanapomaji. Ticcadeni ima tecajiqquimera-manapomadsa Diodsa tiquejenanipomaji. Nema tiquinejeradsapi tiadeni onajidsobaqquinitohui. Pina tetideni ajimama canaraha tiadenidsa bobotide bacco dsimajarissa onanitohui, onajaro.

<sup>4</sup> —Naraha tiadeni Saradisiodsa titiqueriqqui najaro motadeni ajijaro dsamacca imasiridsa toquejenanipoma-jarahi. Poccadeni imapi pina poccadeni etero tohoba-jerajarossa najaro. Nidsa ohuadsa madimanadsapa pohuadenidsa etero noponi da onaridsanitohui. Bicaqquri najarijine ohuadsa etero noponidsa jahiridsahitohui. <sup>5</sup> Occa dacorehema timadimanadsa imasiridsa deni tiquejenadsapi nidsa dsotode etero noponi tedsaridsamananitohui. Diocca papeo camittehe cajimana-dsanapohuijineccadsa tiadeni oni dsodo nani sse onaridsa-jeranitohui. Nidsa occa Abi pocca dodosse tabaqquideni tedseje

baccodenihuaji tidomo huadsa: “Ajaridenipa occa madija” onanitohui.

6 —Dio Corimepa otahimaridsa quequeriqquimana najaridenidsa huati huati tajari. Aji huapima titiqueriqquiridsa nanihuaji teribodeni ticajimanadsapi Pohua Atti timittamananissa taji -nade Jeso.

*Odsa panani Piradeopiacca Jesocristodsa quequeriqquimana najaridenidsa Jesocristo pohua atti dosse inajaro*

7 Jesocristo ohuadsa huati dsanapojari: —Piradeopiahuaji otahimaridsa quequeriqquimana najari cacahuadedsa dsodo taji -nade. —Ohuapi pajissa. Obodi ssiaja, huire tajaro. Maittaccadsamacca tamine Dabicca pipico ocajini. Najari pipicodsa Jerosare dsaticca noccobiji ohuacahuajaro. Madija Diodsa memehuaji madimanahijine jehe onadsapi jai tojedsimahitohui. Jehe onejeradsapi jai tojedsima-jarahitohui. 8 Ohuapi aji huapima tidsepedeni ijridsamanajarocca nahato onani. Nidsa Dio madihihuaji tiadenidsa: “Jai tijedsimaji” onanitohui. Nanihuajicca noccobiji tiadenidsapi tohuabani. Madija ohuaha ecossanijine ssamo tani. Tiadenipi dacoco tijira-jeraraha ohuattidsa iboraqquri tiquinani. Madijajine nanajidso tiquejenadsa naqui ohua oni tinebomana-jerani.

9 —Titohuideni ohuati huana tani. Nidsa ma-maidsadedeni ojine tibaccodenihuaji pohuadeni pitodsa jassi tahitohui. Nama onanabaqquid-sapa tiadenidsa ohuati huana tani pohuadenidsa

ahuato tanitohui. Najari jodioleni mota atti-  
denipa: "Iapi jodioleni, Diocca madija iqueje-  
najaro" quiquinanaraha pajissapa Diocca huadi  
Satanacca medse toquejenajari.

10 —Tiadenidsa huati onapojaropi:  
"Ocasserani temanaraha mohuaradsa  
tinahanamanana" onapode. Nadsama  
ohuatti tecahuamananissa tadsa aja dsama  
huapimacca madija ima ocassera tanicadsa  
nattome onabaqquidsapa tiadeni dsori  
onanabaqqunitohui. 11 Occanibote nani.  
Ticcadeni ima bicanipi tecahuamananissa taji.  
Ohuadsa disseraqquri tiquinadsapi Diocca  
daniji bicani ticajimananitohui. Paji, ticcadeni  
jeheniji madija inassamomanarana. Diocca  
daniji pohuadenijine dsori ticanirerana. 12 Occa  
dacorehema timadimanadsa, imasiridsa deni  
tiquejenadsapi nidsa dsotode occa Abi Dio  
madihihuahaji timadimananitohui. Ojine tiadenipi  
pina memehujicca Pohuadsa dada toqquimacca  
odsa pininissa tiquinanijine. Nanidsapi jai  
tijena-jeranitohui. Occa Abi Dio oni tiadenidsa  
dsodo, Pohua madihihuahajicca odsa panani onini  
naqui dsodo onaridsanitohui. Najaro odsa  
panani oninipi Jerosare dsati. Najaropi occa  
Abi Djine memehujicca namihuhaji bacco  
naronanitohui. Ohua oni dsati naqui tiadenidsa  
dsodo onaridsanitohui.

13 —Dio Corimepa otahimaridsa que-  
queriqquimana najaridenidsa huati huati  
tajari. Aji huapima titiqueriqquiridsa  
nanihuaji teribodeni ticajimanadsapi Pohua  
Atti timittamananissa taji -nade Jeso.

*Odsa panani Laodiseacca Jesocristodsa quequeriquimana najaridenidsa Jesocristo pohua atti dosse inajaro*

<sup>14</sup> Jesocristo ohuadsa huati dsanapojari: — Laodiseahuaji otahimaridsa quequeriquimana najari cacahuadedsa dsodo taji -nade. — Ohuapi pajissa. Aji huati huati onajaropi pajissa qqui onajaro imara huati huati ohonanajaro. Huapima Abi Dio inahatoridsajaripa ojine tojaridsajari. Nadsama ohuatti tiadenidsa ajima onajaro: <sup>15</sup> Ticcadeni ima huapima tinanamanajaro nahato onani. Ohuadsa jehe tiquinajaropi tinebomana-jeraraha ohuadsa tetidsemana-jerani naqui nahato onani. Jaho, ohuadsara tetidsemaneri naccaraho. Tiadenipi pina bani ppejene ppocora-jarajarissa, pina passo nahui tejerajarossa tiquinajaro. Nema naniccapi dse nanijine ocassera tajaro. <sup>16</sup> Pina passo nahui tejerajarossa tiquinajaropi tiadeni capiri onanitohui. Ticcadeni ima ocassera tadsapi tiadeni ohuattajo-baqqunitohui. <sup>17</sup> Naraha tettidenipi: “Iapi ima bicani sseqquiri inani. Ijine icca ima toccanissa tani. Icappira-jerani” titiquina naraha tibodideni huatonissa tejerani. Ima pajissapi ssamoqquri tiquinani. Ticcadeni imapi bica tejerani. Tohuati nahanaqquri tiquinani. Ticappiramananissa tajaro. Pina madija nocco sirissa tiquinajaro. Pina etero jiraha ccorojedeni madimanajarissa tiquinajaro.

<sup>18</sup> —Nadsapi tibodideni acco ocamabaqquni-jine tiadenidsa huati onana: Aji ohua ocajarocca mitta tiquinaji. Nadsana ima bicani

ticajimananijine. Najaroa ima bicanipi pina oro dsippo pporadsa todsibehidsapi huatini ccara tanicassa najaro. Aji ticcorojedeni noppineni ticappinamanadsapi etero noptoni ocajijaro mitta tiquinaji. Najaro tedsamanadsapi ticcorojedeni ahuato tejeranijine. Aja tonococca jemedsi ocajijaro naco mitta tiquinajo, tinoccodeni sse tiquinadsapi tinoccodeni ssire taridsanijine, onajaro.

<sup>19</sup> —Ohuapi madijadsa ohuati huana tadsa imasiri inanamanadsapi ohuatti dacorehema pohuadenidsa: “Nema tiquinejeraji” ohonanajaro. Poccadeni ima tobicanijine naqui mari mari onajaro. Ohuadsara tetidsemanaji. Ohuadsara diseraqqiri tiquinaji. Tibodideni cacajiqquimeradsa Diodsa tiquejenanipomaji. <sup>20</sup> Ohuapi noccobijidsa huahua onajaro. Madija ohuatti mittadsa noccobiji icatabojidsadsapi pohuadsa oqquedsimanitohui. Oqquedsimadsapi pohua tedseje ijipanitohui. Pohua naco ohuadsama jipahitohui. <sup>21</sup> Ohuapi imasiridsa deni ojajarojine occa Abi dosse dosse nahihuaji ohuittarijaro. Tiadeni naqui imasiridsa deni tiquejenadsapi nidsa dso-tode ohua dosse dosse onanihuaji tiadenidsa: “Jassi tinariji” onanitohui.

<sup>22</sup> —Dio Corimepa otahimaridsa quequeriqquimana najaridenidsa huati huati tajari. Aji huapima titiqueriqquiridsa nanihuaji teribodeni ticajimanadsapi Pohua Atti timittamananissa taji -nade Jeso.

### *Memehuaji Diodsa huatidsemanajari*

<sup>1</sup> Aja Jesocristo pohnadsa quequeriqquimana najaridenidsa ima huati tahi jicani nattinipi qq̄ui onaneje memehuaji pina noccobiji tohuabajarossa nehe qq̄ui onajaro. Atti naco dacorajari pina jejei mohui omittapojarossa najaro omittapomajaro. Nadsapa ohuadsa huati tajari: —Ahuaji ticcamacossaji. Jidacca qq̄ui tinajaro nattini dsotode tojanijinecca ima tiadsa nohue onana -nade.

<sup>2</sup> Nadsapi Dio Corimecca nahatohue ohuadsa ssonaridsa qq̄ui onaneje meme Dio dsamarihuaji deni tojahicca huihuittari bicabote qq̄ui ocanajaro. Najaro huihuittaridsa huittari canahi qq̄ui onajari. <sup>3</sup> Aja huittarijari pa ohuadsa ahuatata tajari. Pohnapa dsibehi tajari. Dsibehine pina siba huatini ccara tanicca dsibehinissa najari. Pina diamante dsibehinissa, pina robi dsibehinissa najari. Pohna huittarihi tetepidsa naqui meme janoni porimacossani qq̄ui onajaro. Janonipi pina siba esemeraoda dsibehinissa najaro. <sup>4</sup> Pohna huittarihihuaji qq̄ui onadsapi cacahuadedeni 24 quinaha jassi tariridsajari. Dodossededenicca huihuittari bicaqq̄ui najarodsa jassi nahujanijari. Poccadeni etero nopoqq̄ui najaro. Pohnadeni tatidsa tamine taticca oro nahatoni huittariridsajaro. <sup>5</sup> Pohna huittarihidsa ssiiede ssiehe canajaro, ttotorode ttororo canajaro. Mohuini onih naqui qq̄uenaridsajaro. Poca huihuittari bicabote tadsajanima jojororo 7 naha jororo canaridsajari. Najari jojororopa Dio Corime ahuatoridsajari. <sup>6</sup> Nani poca huihuittari bicabote tadsajanimapi pina

coridsa imenissa naraha ccara tajaro. Tocassieje-qquimera najaro, pina siba cristaossa najaro.

Nahi Pohua huittarihi inoridsa naco camit-taqquri najarideni 4 quinaha huahueri nahua-janijari. Pohua baccohuaji, pohua idehuaji, pohua ppari nahatonihuaaji, pohua ppari ssamo-huaji naridsamanajari. Camittehe cajimana-jari assiredenidsapi noccodeni ijiridsajaro. Po-huadeni tedsejema qquide nahatoqquri, po-huadeni nattiuhaji qquide nahatoqquri najari. <sup>7</sup> Najarideni ojaría tahideccapa pina dsomaji. Ohuahapa pina bohui. Ohuahapa pina madija pano. Ohuahapa pina ssibiri imehibote meme toccajarissa najari. <sup>8</sup> Aja 4 quinajaridenipa eppedeni 6 naha cajiridsamanajari. Assiredenidsa noccodeni ijiridsajaro. Eppedeni bodihuaji naqui noccodeni ijiridsajaro. Nadsama po-huadenipa ssiajama jijiri, dsomema jijiri dsad-sanapomana najari. Puhuadeni attipa:

—Ia Medsede Diopa bicabote. Bodi ssiaja tahi, huire tahi ojarihi.

Pohuana dacorabote ojarihi.

Pohuapa nadsama madipojari. Madihipaja nahi. Nidsa ccajonahitohui -quiquinanajari.

<sup>9</sup> Aja deni tojahicca huihuittari bicabotedsa huittari canajaripa madidsanapojari. Najaridsa camittehe cajimanajaridenipa huati toquinajari: —Ticca nahatohue deni tojani, tiadsa etidsejaro, iadsa tijine bica tani, inajaro -quiquinanajari. <sup>10</sup> Najaro huati huati totoquina nadsapa cac-ahuadedeni 24 quinajari aja Madidsanapojari

tedsejema pohnadeni pitodsa jassi tadsa Pohnadsa huatidsemanajari. Pohnadsa huatidsemanadsa pohnadeni taticca oro nahatoni pohna huittarihi tedsejema hua inaquimanajari. Nadsapa attideni ajama quinajari:

<sup>11</sup> —Ia Medsede icca Dio, Tiadsa etidseni bica tani.

Tiana dsama huapimadsa cajiridsajaripa tinahatoridsajari.

Tia tohuini tadsa tijine huapima nahatoridsajari. Najarojine madija huapima tiadsa: “Bica tinani, deni tijani” quinahijine bica tani, inajaro -quinade.

## 5

### *Edede Bedi papeo pico naqquni idijaro*

<sup>1</sup> Nadsapa deni tojahicca huihuittari bicabotedsa huittari canahihuaji qqui onaneje pohna dsepe nahatoniccadsa papeo pico naqquni dsojo tojidsajari. Bodihuaji dsodo, huapihuaji dsodo najaro. Nepi tamaroni 7 nehe cajijaro. <sup>2</sup> Diocca dodosse dacorabote ojaria qqui onajari. Pohna atti mohui tadsa huati tajari: —¿Nejecojarina ima jijirade bicabote deni tojajari? Najarina papeo pico naqquni nepi nacossaridsani ssoja ijidsadsa inahabanijine bica tahi -nahi omittade.

<sup>3</sup> Naraha aja memehuajicca, namihuajicca, nami bodihuajicca naco papeo pico naqquni inahabamananijine huapima pajiramanaja cama-jarahi. Bodicca ima qqui quinanijine naqui pajiramanaja cama-jarahi. <sup>4</sup> Nadsapi oji oji onade. Jaho, madija ima jijirade bicabote deni tojajari papeo pico naqquni inahabanijine

nohuerahi. Qquide naco pajiramanaja cama-  
 jarahi, onade. <sup>5</sup> Naraha nahihuaaji cacahuad-  
 edeni jassi nahujanijari 24 quinajari ojaria  
 ohuadsa huati tajari: —Oji tejeraji, aja Isaraeri  
 bedi Joda potemahi dacorehe cajijari pina dso-  
 majissa najari. Najaripa Isaraeridenicca tamine  
 Dabi Potemahi. Pahuana dsoqquehedsa deni  
 tojajari. Papeo pico naqquini inahabanijine  
 pajirahi. Pahuana nepi nacossanicca 7 nehe  
 ssoja ijidsaridsanijine bica tahi -nade ohuadsa.  
<sup>6</sup> Nadsapa deni tojahicca huihuittari bicabotedsa  
 huittari canahihuaaji qqui onanaja Edede Bedi  
 Jeso pina inanadsoqque-manapojarissa naraha  
 hua canajari. Pahuapa camittehe cajimana-  
 jarideni 4 quinajari, cacahuade 24 quinajari  
 domodeni huahi nocconidsa huajari. Aja ori  
 7, nocco 7 najaripa Dio Corime 7 naha dsama  
 huapimadsa qquide jahiridsahijine Dio dosse in-  
 abaqquijari. <sup>7</sup> Nadsapa Edede Bedipa papeo pico  
 naqquini idinijine deni tojahicca huihuittari bi-  
 cabotehuaji toccajari. Nahidsa huittarijari dsepe  
 nahatoniccadsa papeo dsojo ijidsajaro idijaro.  
<sup>8</sup> Najaro papeo ididsapi camittehe cajimanajari-  
 deni 4 quinajari, cacahuadedeni 24 quinajari ted-  
 seje Edede Bedi pohua tocattahihuaaji pohuadeni  
 pitodsa jassi tajari. Pahuadenipa titire oni arpa  
 cajimanajari. Pahuadeni dsepedsa tasao oro  
 nahatoni bodidsa nahatohui majo bicabote caji  
 naha dsojo dsojo tojidsamaneri najari. Majo  
 bicabote tohuessidsa jami-mi canajaripa Diocca  
 madija Pahuadsa huati huati totoquina nahicca  
 ima. <sup>9</sup> Pahuadenipa ajie dsati jiri icanamanad-  
 sapi ajama quinajari:

—Tiana bicabote deni tijani ojari tajaro. Papeo pico naqquini tidijaro bica tani.

Nepi tamaroni 7 nehe cajiraha ssoja tijidsanijine bica tani.

Tiana tia inanadsoqqe-manadsa temene toccajarodsa Diodsa toquejenahijine mitta tinabaaqquijaride.

Aja madija dsama onihi onihidsa madirid-samanajarideni mota, tohuatti onihi onihi cajiridsamanajarideni mota, huapideni onihi onihi cajiridsamanajarideni mota tijine Diodsa toquejenaridsajari.

<sup>10</sup> Tijinepi Abi Diocca cacahuehedsa tamine toquejenaridsajari.

Tijinea Abi Diodsa dsepedeni ihijimana najari. Pohnadsa huahuati toqquimade toquejena, dada toqquimade toquejena najari. Pohnadsa jiri jiri quiquinanajaripaja.

Aji namihuaji madimanajarideni huapima dossede toquejenaridsahitohui –quinade, jiri jiri quinadsa.

<sup>11</sup> Nadsapi qqui onaneje deni tojahicca huihuittari bicabote cahittarinihuaji Diocca dodosse tabaqqui memehujicca huapima attideni omitajaro. Nahi huihuittari cahittarinihuajipi camittehe cajimanajarideni domo huahuajani, cacahuadedeni naco domo huahuajani nahi idedenihuaji Diocca dodosse tabaqqui qqui onabaaqquiraha siba tahi. <sup>12</sup> Najaridenipa jiri jiri quinadsa attideni mohui taha ajama quinajari: —Edede Bedi dsoqquepojaripa deni tojjari.

Pohnana huapimadsa dosse dosse nahi pajirahi, bica tahi.

Dsama huapimacca biquehe pohuadsa tojanijine  
bica tani.

Pohuana bodi nahato tahi ojari nahi.

Pocca dacorehe deni tojani bica tani.

Huapima attidenipa: “Tiana icca Tamine deni  
tojahicca.

Ticca deni tojehe nema dsanapona” quinana,  
inajaro.

Pohuadsa etidsedsa: Tiana bica tinani, deni  
tijani, inanijine bica tani –quinade.

<sup>13</sup> Nadsapa Diocca nahatonaja huapima attideni  
omittajaro. Memehujicca, namihujicca, nami  
bodihujicca, passo imenicca jiri jiri quinadsa  
ajama quinajari:

—Deni tojahicca huihuittari bicabotedsa huittari  
canajaridsa,

Edede Bedi pohuadsa naco etidsejaro.

Pohuadenidsa etidsedsa: Tiadenina icca Tamine  
deni tiquejenanicca.

Ticcadeni deni tojehe nema dsanapona, inajaro.

Ticcadeni dacorehe deni tojani, bica tani, ina-  
jaro.

Najaro ima bicani nemanehipi tiadenidsa nema  
dsanaponitohui, inajaro –quinade.

<sup>14</sup> Nadsapa camittehe cajimanajarideni atti-  
denipa: —¡Pajissa nema nana! –quinade.

Nadsapa cacahuade 24 quinajarideni pohuadeni  
pitodsa jassi tadsa deni tojahicca huihuittari  
bicabotedsa huittari canajaridsa huatidsemana-  
jari. Edede Bedidsa naco huatidsemanajari.

## 6

*Papeo pico naqquni nepi tamaroni 7 najaro*

<sup>1</sup> Ocattoma cananeje papeo pico naqquni nepi tamaroni 7 najaro tahidecca Edede Bedi ssoja ijidsani qqui onade. Nadsapa camittehe cajimanajarideni 4 quinajari ojaria jadsirema huahua nahi omittade. Pohua atti mohuini pina ttottorode mohuinissa nadsa: —Nija, ahuaji ticcajonaji –najari. <sup>2</sup> Nadsapa bojo nopohui qqquenahi qqui onajari. Najari idedsa huittarijaripa ssissite caji nade. Nadsapa tamine taticca pohuadsa da quinadsa toccajari, jadsiredsa deni tojaridsahijine.

<sup>3</sup> Nadsapa papeo nepi tamaroni dsotodecca Edede Bedi ssoja ijidsajaro. Nanaja camittehe cajimanajarideni ohuaha huahua nahi omittade: —Nija, ahuaji ticcajonaji –najari. <sup>4</sup> Nadsapa bojo ohuaha macco tajari qqquenajari. Najari bojo idedsa huittarijaridsa dacorehe da inajaro, dsama huapimadsa jonehe inajicaridsanijine. Pohuajine madija jadsire inanamanadsa ahuaji tojica, ahuaji tojica naridsamanahijine. Pohuadsa jadsirejine massito imenibote naqui da icanade.

<sup>5</sup> Nadsapa papeo nepi tamaroni onihi 3'cca Edede Bedi ssoja ijidsajaro. Nanaja camittehe cajimanajarideni ohuaha huahua nahi omittade: —Nija, ahuaji ticcajonaji –najari. Nanaja bojo sohuehi qqquenahi qqui onajari. Najari bojodsa huittarijaripa ccanajani nanattome cajide. <sup>6</sup> Camittehe cajimanajarideni domo huahi nocconidsa tohuatti mohuini omittajaropi ajima najaro: —Huada ojarinicca tarabaiadsa manaconipi aroso jidsadsa trigo kilo ojaria pajirahitohui. Najarossa najaro huada ojarinicca tarabaiadsa manaconipi aroso jidsadsa cebada kilo 3 naha

pajirahitohui. Naraha ahua bono oribo oquine, uva ppejene naco huati ccara tadsapa pohuama sso tiquina tajarana -nade.

<sup>7</sup> Nadsapa papeo nepi tamaroni onihi 4'cca Edede Bedi ssoja ijidsajaro. Nanaja camittehe cajimanajarideni ohuaha huahua nahi omittade: —Nija, ahua*ji* ticcajonaji -najari. <sup>8</sup> Nanaja bojo huessehi qquenahi qqui onajari. Idedsa huittar-ijari onipa Dsoqqe*he*. Pohua nattihuaji ohuaha ccajonajaripa dsoqquemana-pojarideni corime cacahuade. Najarideni pamahadsa dacorehe da quinajaro. Madija dsama nemanehedsa madi-manajarideni mota inajidso-baqquimanahijine. (Najari mota caria attidsapi: cuarta parte, quina-jari.) Jicahijinepa jadsireds*a* tojica, pemidsa tojica, dsamacomadsa tojica, bani huadi tajarijine tojica nahitohui.

<sup>9</sup> Nadsapa papeo nepi tamaroni onihi 5'cca Edede Bedi ssoja ijidsajaro. Nanaja Diodsa da tahi-jinecca huahuanari dopanidsa jicapojari corime-deni qqui onabaqquide. Najaridenipa Dio Attidsa disseraqqiri najari, aja Jesocristo tahimari huati huati nanaridsamana najarijine tojicajari. <sup>10</sup> Nadsapa attideni mohui tadsa huati toquina-jari: —Ia Medsede Dio, Tiana deni tijani. Tibodipi ssiaja, huire tani. Tia huati tinadsapi Tetti pajiranissa tinananitohui. ¿Nejecoma nadsa namihuaji madiridsa-manajaridenicca ima ticat-temanijine? ¿Nejecoma nadsa emene toc-ajaro manaconi ia nanadsoqquededeni tina-jidsobaqquihijine? -quinade. <sup>11</sup> Nadsapa etero noponi huedsamanahijine pohuadenidsa

da inaridsajaro. Pohua Attipa: —Jassi tiquinacaj. Timecotedeni pina tiadenissa quinajari Jesocristocca dossenijidsa dsepedeni ijimanaccajari. Nidsa pina tiadeni tijicapojarossa quinacahitohui. Najaridenitohui badsira tehe timadimanaccaji —nade Dio.

<sup>12</sup> Nadsapa papeo nepi tamaroni onihi 6'cca Edede Bedi ssoja ijidsajaro. Ocattoma cananeje dsama nemanehe dsadsa najaro. Majipa todsid-sijari. Pina etero sohueni madija dsoqquehitohui oji quinadsa huedsamanajarissa najaro. Abadsico naco tocamaccojari, pina tohuemenessa canade. <sup>13</sup> Memehuaajicca abadsico bedi naco namihuaji catojaridsajari. Pina ahua iquiera bono biridsati jojode dacorabotejine catojaridsajarissa nade. <sup>14</sup> Meme naqui pina papeo pico-co-co naqquijarossa nadsa amossi nade. Ssono imeni huapima naqui pajimaranidsana tojaridsajaro. Passo imeni nocconidsa dsama huihuittidsacosseri najaro naqui pajimaranidsana tojaridsade.

<sup>15</sup> Nadsapa dsama huapimacca tamedenedi, dsama cacahuadedeni, soldado dossededeni, huapimapa ssonohuaajicca siba odinihuaji pohuadeni tonajimaridsamana, ssonohuaajicca siba imeni caji tanihuaji naco pohuadeni tonajimaridsamana nade. Aja todsepetaji sseqquiri najarideni, deni toquejenajarideni huapima naco nama quinade. Aja madijacca dodosse toquejenajarideni, madijacca dodosse toquejena-jarajarideni huapima naco ssonohuaji pohuadeni tonajimaridsamana.

<sup>16</sup> Cappinamanadsa attidenipa: —¡Ssono, siba

iadsa cojo nariccaraho! Bodi iquejenadsapi deni tojahicca huihuittari bicabotedsa huittari canajari ia qqui tabaqqui-jarahijine. Aja Edede Bedicca najidsohue oppinabotedsa ahuatoraqquri inanijine. <sup>17</sup> Jidapanana Edede Bedi Jeso pohua Imehi tedseje poccadeni najidsohue imeni tojanijinecca huada bacco tani. Najaro najidsohuepi issiajanijine ipajirajerani -quinade.

## 7

### *Isaraeri bedi 12 quinajarideni potemahi Dio inajanoridsajari*

<sup>1</sup> Najaro jicadsapi Diocca dodosse tabaqqui 4 quinaha nami jicaqquinihuaji huahueri naridsahi qqui onabaqquide. Ohuahapa maji ccajonahihuaji hua, ohuahapa maji toccahihuaji hua, ohuahapa arobenihuaji hua, ohuahapa arobeni onihihuaji hua naridsamanade. Najaridenipa jojode 4 nehe ecossamanajaro, namidsa jappo-ppo canaridsa-jeranijine. Passo imeni naqui jene torani nanijine, ahua eppe naco jene torahi nahijine jojode joma inanamanajaro. <sup>2</sup> Pohuadenipa dacorehe cajimanajari, nami, passo inajidsoridsa-mananijine. Nadsapa Diocca dodosse ohuaha maji ccajonahihuaji ccajonahi qqui onajari. Najaripa Dio Camittehe cajjaricca nanajano dsojo najonajari. Nadsapa Diocca dodosse tabaqqui 4 quinaha huahueri nahuajanijaridenidsa jadsirema huahua nade. <sup>3</sup> Pohua atti ajama najari: —Aji nami, passo, ahua tinajidsomana-jeraccaji.

Nidsa icca Diocca medsedeni assaridenidsa najanoridsaccana –nade.

<sup>4</sup> Nadsapa madija najanoridsamanahi onideni omittajaro: 144 mil (144,000) quinade. Najaridenipa Isaraeri pohua potemahi. Pocca ejedeni 12 quinajaridenicca madija. (Caria attidsapi: 12 tribus, quinajari.) <sup>5-8</sup> Isaraeri bedi potemahideni najanoridsamanahipa ajama quinajari:

Joda potemahi 12 mil (12,000),

Robano potemahi 12 mil,

Cado potemahi 12 mil,

Asera potemahi 12 mil,

Netari potemahi 12 mil,

Manase potemahi 12 mil,

Simeo potemahi 12 mil,

Rebi potemahi 12 mil,

Isacara potemahi 12 mil,

Dsaborona potemahi 12 mil,

Jose potemahi 12 mil,

Benjamin potemahi 12 mil quinaha najanoridsamanade.

*Madija panahicca eterorideni nopoqquri najaridenicca ima*

<sup>9</sup> Najaro ima jicadsapi ocattoma cananeje madija panahicca qqui onabaqquide. Qqui onabaqquiraha onocco ssonaqqui nade. Madija dsama onihi onihidsa madiridsamanajarideni mota, huapideni onihi onihi cajiridsamanajarideni mota, tohuatti onihi onihi cajiridsamanajarideni mota naco qqui onabaqquijaride. Deni tojahicca huihuittari bicabote cahittarinihuaji, Edede Bedi tedsejema huapima domodeni huajari. Eteroridenipa nopoqquri najaro. Diodsa

huatidsemanadsa birijari eppe dsojojo dsojojo canade. <sup>10</sup> Attideni mohui tadsa huahua quinade:

—Icca Dio deni tojajaripa pocca huihuittaridsa huittarijari.

Najaripa ia Tonassiajade.

Edede Bedijine naqui icassiejerajaro -quinade.

<sup>11</sup> Nahi deni tojahicca huihuittari bicabote cahittarini tadsajanima camittehe cajimanajari-deni domo huahuajani, aja cacahuadedeni domo huahuajani, nahi idedenihuaji Diocca dodosse tabaqquideni huapima domo huahuajani najari. Najarideni huapimapa Diocca huihuittari tadsajanima poadeni pitodsa jassi tadsa tocatted-samanadsa assarideni namidsa bacco tadsapa Diodsa huatidsemanajari. <sup>12</sup> Attidenipa ajama quinajari:

—¡Pajissa nema nana!

Dio, Tiadsa etidsedsa: Tiana deni tijani, inajaro.

Ticca deni tojehe nema dsanaponitohui.

Tiana nahato tinani ojari tani.

Tijine bica tani, icca Tamine deni tijani ojari tani.

Ticca dacorehe deni tojani, bica tani.

Tiadsa icca huatidsehe nema dsanaponitohui, inajaro.

¡Pajissa nema nana! -quinade.

<sup>13</sup> Nadsapa cacahuade 24 quinajarideni ojaria ohuadsa huati tajari: —Aja eterorideni nopoqquri najaridenipa ¿nejecojarideni? ¿Nahato tinaqui? ¿Nejecohuajicca jahijonajari? -nade. <sup>14</sup> Naraha manaco poadsa huati onade: —Tiana nahato tinani -onade. Nadsapa ohuadsa huati tapomade: —Ajararidenipa

namidsa ocasserani imeni tonahana-manaraha Jesocristo tahimari nebomana-jarajari. Edede Bedi Jeso pohua emene toccajarojine poccadeni tabaccorehe tomossijaro. Najaria aja etero noponi cajimanajaripaja. <sup>15</sup> Najaria aja Diocca huihuittari bicabote tadsajanima huapima domodeni huajaripaja. Diodsa dada toqquimacca odsahuaji huatidsemanadsapa dsome dsepedeni ijimana, ssiaja dsepedeni ijimana najari. Deni tojahicca huihuittaridsa huittari canajaripa pohuadeni cacahuade pohuadenidsa madiridsahitohui. <sup>16</sup> Nadsapa pemimana-jarahitohui, baccodeni naco dsarimana-jarahitohui. Maji ppoconejine imedeni camana-jarahitohui. Ppoconi naqui pohuadenidsa ocassera tejeranitohui. <sup>17</sup> Najaro ima tojanijinepi aja Diocca huihuittari bicabote tadsajanima Edede Bedi huajarina pohuadeni ecahuabaqquihitohui. Pina edede cacahuade pocca edede ecahuabaqquijarissa nahitohui. Passo bicani camittehecca sibadsa qquenajarrocca dse dse dsanapomanahijine pohuadeni eccaridsa-baqquihitohui. Poccadeni ojiepi Dio inajicanitohui. Noccodeni ppejene sse inaridsadsapa denima oji quina-jarahitohui -nade cacahuade ojaria atti.

## 8

### *Nepi tamaroni jicanicca ssoja ijidsajaro*

<sup>1</sup> Papeo pico naqquni nepi tamaroni 7 najaro jicarinicca Edede Bedi ssoja ijidsadsapi memehuai madimanajarideni huapima maji ojaria tocadidire najari. (Caria attidsapi: media

hora, quinajari.) <sup>2</sup> Dsotodepa Dio Pohua tedsejema pocca dodosse tabaqqui memehujicca 7 quinaha domo huahuajanihi qqui onabaqquijari. Pohuadenidsa jejei 7 naha da inaridsajari.

### *Nahatohui majo bicabote*

<sup>3</sup> Dsotode Diocca dodosse ohuaha ccajonajari, nahatohui majo bicabote totohuessicca huahuanari tadsajanima huajari. Pohua dsepedsa tasao oro nahatoni majo bicabotejine dsojo ica-jidsajari. Nadsapa pohuadsa nahatohui majo bicabote huapi taha da quinajari, iessihijine. Iessidsapa essene majo Diodsa pajissa quinaridenicca huatinaja tadsajani Diodsa bacco bacco tajaro. Nadsapa huihuittari bicabote tadsajanima totohuessicca huahuanari oro nahatoni tetepinidsa iessijari. <sup>4</sup> Nadsapa Diocca dodosse dsepedsa dsojo icajidsajari majo bicabote jamimine aja Diodsa pajissa quinajaridenicca huatinaja tadsajani toccamacossadsa Diodsa bacco tajaro. <sup>5</sup> Nadsapa Diocca dodosse tasao dsojo icajidsajaridsa majo bicabote totohuessicca dsippo ononi jadarini inajijaro. Nadsapi namihuaji quissa inaronaneje oppina tehe tojaridsajaro. Ttororo caneje, mohuini jidsa tehe tomohuiridseje, ssiehe caneje, namihuaji naqui nami dsadsa neje najaro.

### *Jejeidsa jei jei quinajari*

<sup>6</sup> Nadsapa Diocca dodosse tabaqqui 7 quinajari jejei 7 naha cajimanajaridenipa najoramanajari, jei jei quinahijine. <sup>7</sup> Nadsapi Diocca dodosse tahidecca jei jei nanaja passo ccara tojani, dsippo

jadarini tohuemene quejemehe quissa inaronajaro. Najarojine nami arobeni diji tadsapi ahua mota diji, dsero nemaneha diji taridsajaro. (Arobenipi caria attidsa: tercera parte, quinajari.)

<sup>8</sup> Nadsapa Diocca dodosse dsotodecca jei jei nanaja jororoni imeni pina ssono imenissa najaro coro inaronadsapi passo imenidsa ssonippajaro. Nadsapi passo imeni arobeni tohuemene tojaridsajaro. <sup>9</sup> Passo imeni abari mota jica, canoa imeniboteca mota tojica, canoa benedicca mota tojica najari.

<sup>10</sup> Nadsapa Diocca dodosse 3'cca jei jei nanaja abadsico bedi mota cajirajari memehuai diji tocanaha jororone motarehema cassonajari. Nami arobenidsa cassonadsa hueni motadsa, passo sibadsa qquenajaro motadsa cassonipparidsajari. <sup>11</sup> Abadsico bedi mota cajirajari onipa: Bidabote. Najarijine passo motapi tobidaridsajaro. Najaro passo dse quinadsapa madija huapi taha cacotaridsajari.

<sup>12</sup> Nadsapa Diocca dodosse 4'cca jei jei nanaja maji arobe totabaccora, abadsico arobe tocatabaccora, abadsico bedi mota totabaccoraridsa najari. Nadsapa huapima arobe ohuiridsajari. Najarojine ssiajani arobenipi tossiajani nejerani. Dsome arobeni naqui tossiajani nejerani. <sup>13</sup> Dsotode meme napicossanidsa ssibiri potajari toccahi qqui onajari. Toccadsa atti mohui tahi omittajaro. Pohua atti ajama najari: —¡A, jaho! Namicca madijapa tohuati nahanacquiri nahitohui. Nidsa Diocca dodosse

tabaqqui ohuahadeni 3 quinajari jei jei quinad-sapa ima denima oppina tanicca tojanitohui -nade ssibiri potajari.

## 9

### *Diocca dodosse 5'cca jei jei najari*

<sup>1</sup> Nadsapa Diocca dodosse 5'cca jei jei nanaja memehuaajicca abadsico bedi namidsa casson-adsa cahittahi qqui ocanajari. Najaripa Diocca dosseniji. Pohnuadsa nami odini huaji tanicca pipico da inajari. <sup>2</sup> Nami odini huaji tanicca noccobiji itabojidsaneje odi bodihua-jicca essenii qqenajaro. Pina dsippo imeni-bote jororoni essenissa najaro. Najaro meme ijidsapi tosohueni nadsa maji amossi najari. <sup>3</sup> Najaro essenidsa sese ahuatoma-manadsapa namihuaji jahironana canaridsajari. Nadsapa nami huapimadsa ijiridsajari. Madija itahuajina-manahijine comenedeni dacorehe cajiridsamanajari. Pina dsorima ssidede orissa naha pohuadenidsa da inaridsajaro. <sup>4</sup> Pohuadeni dossede attipa: —Dseropi tinajidsomana-jeraji, moro taridsahicca tinajidsomana-jarajo, ahua appani naqui tinajidsoridsamana-jeraji. Naraha madija assaridenidsa Diocca nanajano cappi-ramanajaridenira tinajidsoridsa-baqquimanajo. <sup>5</sup> Naraha tijinedeni ahua-jeraji, onajaro -najari. Nadsapa abadsico 5 canaha pohuadeni comene madijadsa inanaridsamanadsapi pina dsorima ssidede comene ahumanajarissa quinahitohui.

<sup>6</sup> Nidsaranibote najaro ima tojadsapi madija ocasserani ahuamanadsa attidenipa: —Ijica nac-caraho –quinahitohui. Naraha dsoqqehe pohuadenidsa huaji tanitohui.

<sup>7</sup> Sese huapimapa pina bojo jadsiretohui najoramanajarissa quinajari. Tatidenidsapi oro nahatoni pina tamine taticcassa najaro huit-tariridsajaro. Panodenipa pina madija pano naridsamanajari. <sup>8</sup> Tatideni conepa pina amoneje tatinideni conanissa quinajari. Inodeni naco pina dsomaji inossa quinajari. <sup>9</sup> Pohuadeni assire cacahuamanahijinepa ppejo nahatoni ccarabote jadsirejinecca huedsamanajari. Eppe-deni mohui naco pina nami jojoppade bojocca huapi tehe jadsiretohui domoni toccajaro mohuini dacorajarossa najaro. <sup>10</sup> Dsoporidenidsa naco pina dsorima ssidede ori comenessa naha cajiridsamanajari. Najaridsa abadsico 5 canaha madija inajidsobaqqi-manahijine. <sup>11</sup> Sesedenipa tamine cajimanahi. Pohuapa nami odini huaji tanicca cacahuade. Pohua oni jodi-odeni atti ebreodsapa: Abadón, quiquinanajari. Dsama Cresiaccata madija attidenidsapa: Apolión, quiquinanajari. (Najaripa: Toponi nanajicade, inajaro.)

<sup>12</sup> Nadsapi ima oppinabote tahidecca jicaraha denima pamehe dsoriri taccani.

### *Diocca dodosse 6'cca jei jei najari*

<sup>13</sup> Nadsapa Diocca dodosse 6'cca jei jei nanaja tohuatti omittajaro. Dio baccohuaji huahuanari oro nahatoni orini 4 najaro nocconidsa tohuatti mohuini qqunenajaro. <sup>14</sup> Najaro tohuattipi Diocca

dodosse 6'cca jei jei najaridsa ajima najaro: — Diocca dodosse tabaqqui memehuaajicca 4 quinarideni hueni imehi Eoparatehuaaji ssoque top-pidsa ecahuabaqquijari. Jahiridsahijine tappa tinabaqquijo –najaro.

<sup>15</sup> Nadsapa Diocca dodosse tabaqqui 4 quinajarideni tappa inabaqquijari. Madija mota inajicaridsa-manahijine jai tojajari. Pohnadenipa najaro imadsa dsepedeni ijjiridsa-manahijinepa najoramanapojari. Aja pohnadeni dsepe ijihijinecca maji, huada, abadsico, huajano bacco tadsa dsepedeni ijimanajari. <sup>16</sup> Poccadeni soldado bojo idedsa jassi tarijaridenipa 200 millones (200,000,000) quinajari.

<sup>17</sup> Najaropi Dio Corimejine onoccodsa ahuato tajaro. Aja bojodsa jassi tarijaridenipa ajama quinaha qqui onabaqquide. Pohnadeni bacco cacahuamanahijine ppejo nahatoni ccarabote cajiridsamanajari. Baccodeniccapi pina dsippo jororoni macco tajarossa najaro, pina meme so-huenissa najaro, pina azufre huesse tajarissa najari cajimanajari. Bojo tatidenipa pina dsomaji tatissa quinajari. Pohnadeni ajaridsapi dsippo jororoni qquna, dsippo essenì qquna, azufre majo tabaccora tajari qquna najari. <sup>18</sup> Aja bojo ajaridenicca 3 naha qqunenajari comenejine madija mota cacotaridsajari. Najaropi dsippo jororoni, dsippo essenì, azufre majo tabaccora tajari comenejine. <sup>19</sup> Bojocca dacorehepi pohnadeni ajaridsa, pohnadeni dsoporidsa najaro. Bojo dsoporidenipa pina maccassa naridsamanajari. Dsoporideni cotanidsa pina macca tatissa

naha cajimanajaridsa comene inanaridsamana-jaro.

<sup>20</sup> Naraha madija dsippo jororoni, dsippo essen, azufre majo tabaccora tajaridsa cacotajarajari motadenipa bodideni cacajiqquimera-jarajari. Tabaccorehe inanamanajarocca nebomana-jarajari. Aja Satanacca dodosse tocorimedenidsa huatidsede nebomana-jarajari. Pohuadeni cacahuade pahuamacca pina ccarara bicabote oro, plata, bronce nahatoni, siba, ahua nahatoni naqui huapimapi qquide ssamoqquri, mittamanahijine ssamoqquri, jahiridsahijine ssamoqquri naraha najaridsa huahuatidsemana najari nebomana-jarajari.

<sup>21</sup> Madija nanadsoqquede, caribajade, huananehe, botie naco nebomana-jarajari.

## 10

*Diocca dodossepa papeo bedeni dsojo tojidsajari*

<sup>1</sup> Nadsapa memehuaji qqui onanaja Diocca dodosse dacorabote ohuaha meme essenima quejemaha ccaronajari. Pohua tatidsa meme janoni porimacossanissa najaro cajijari. Panopa pina maji ssiejenessa najari. Issopa pina dsippo jororoni pamajarossa najaro. <sup>2</sup> Pohua dsepedsa papeo pico naqquni bedeni dsojo ijidsajaro. Pohua amori nahatoniccapi passo imeni tetepidsa cahari, amori ssamohuajiccapi namidsa cahua nadsa huajari. <sup>3</sup> Jadsirema johua nadsapa pohua atti mohuini pina dsomaji huahuade huahua najari mohuinissa najaro. Aja pohua johua

nanaja ttotorode 7 nehe tomohuiridsadsapi attinideni omittajaro. <sup>4</sup> Ttottorode attini jicadsapi attinideni dsodo onanitohuiraha memehuaicca atti omittajaro. Ajama najari: —Ttottorode attini timittajaropi tia motta tibodidsa tecahuaji. Dsodo tejeraji –najari.

<sup>5</sup> Naraha aja passo tetepidsa amori cahari, namidsa amori cahua nadsa huajaripa pajissara huati tahijine pohua dsepe nahatonicca memehuaaji da icanajaro. <sup>6</sup> —Aji huati onajaropi Dio Pohua onima pajissara huati onajaro. Diopa nadsama madijonajari. Meme inahato, nami inahato, passo imeni inahato najaro. Aja Dio Pohua inahatoridsajarodsa madiridsamanajari naco Dio Pohua inahatoridsajari. Ohuattipi pajissa. Ima jicanijinepi najo-jeranitohui. <sup>7</sup> Diocca dodosse jicarihicca jei jei nadsapa Diocca ima ajijaro dsamacca madijadsa ahuato inanapo-geraccajaro ahuato inananitohui. Najaro imapi Diona Pohua Atti cacomeraqqiri najarideni mari icanabaqqipojari –najari.

<sup>8</sup> Aja memehuaaji atti omittapojari ohuadsa huati tapomajari: —Jari, passo imeni tetepidsa amori cahari, namidsa amori cahua najaridsa ticcaji. Pohua dsepecca papeo pico naqquni tohuabajaro tidiji –najari. <sup>9</sup> Nadsapi Diocca dodossehuaaji occajaro. Papeo pico naqquni bedenitohui pohuadsa huati onajaro. Nadsapa ohuadsa huati tajari: —Aja, ajijaro papeo tijipaji. Tejeridsapi majona tajaro. Pina jidsi oquinessa nanitohui. Naraha tidsonedsana tobidani nanitohui –najari.

<sup>10</sup> Nadsapi Diocca dodosse dsepecca papeo pico naqquini bedeni odidsa ojipajaro. Ohuajaridsapi majona tajaro. Pina jidsi oquinessa naraha ohuidsonedsana tobidani najaro. <sup>11</sup> Nadsapa ohuadsa ajama najari: —Madija huapimadsa, aja dsama onihi onihidsa madiridsamanajari-denidsa, tohuatti onihi onihi cajiridsamanajari-denidsa, taminedenidsa naqui Dio pohuadenidsa inananjine tahimari huati tinaridsapomaji -najari.

## 11

### *Dio Atti cacomerabote pamahacca ima*

<sup>1</sup> Nadsapa ohuadsa nanattome huenicca bobassa najari da inajari. Nadsapa ohuadsa da inajaripa ohuadsa huati tajari: —Titehemadsa ticcaji, Jerosarecca Diodsa dada toqquimacca odsa nattome, Diodsa da tahijinecca huahuanari nattome taji. Nahicca madija Diodsa huatidsemanajari hua taridsajo. ¿Nejecoma quinaha animanajari? -najari. <sup>2</sup> —Naraha Diodsa dada toqquimacca boronipi nattome tejeraji. Najaro boronipi jodio quejena-jarajaridenidsa tojani. Najaridenipa abadsico <sup>42</sup> canaha Diocca odsa panani bicabotedsa madimanadsapa pohuadenijine totabaccoranitohui. <sup>3</sup> Nadsapa Dio Atti cacomerabote pamaha ocadossebaqquihitohui. Etero jidsa tanicca pina madija ocasserani ahuamanadsa huedsamanajarissa najaro huedsamanadsa huada 1,260 nehe (abadsico

42 canaha) nama quinahitohui Dio Atti ehecomeramana nanitohui -najari.

<sup>4</sup> Aja Dio Atti cacomerabote pamahapa pina ahua onini oribo pamahassa quinajari. Pina jojororo pinine capamahassa quinajari. Ia Medsede dsama nemanehede Cacahuade tedsejema huatide bajari. <sup>5</sup> Madija attidenipa: — Dio Atti cacomerabote pamaha inajidsobaqquina -quinaraha manacora pohuadeni ajari jororoni qqenajarodsa pohuadeni jarade diji tocaniredsapa ono toquejenahissa tahitohui. Nama quinadsa pohuadeni najidsode tohuini quinajari-deni tojicahitohui. <sup>6</sup> Dio Pohuajine nahatohue cajimanadsapa memecca passo ecossamanajaro. Abadsico 42 canaha Dio Atti cacomerade toquejenadsapa pohuadenijine namihuaji passo qqejerajaropaji. Dio Pohuajinea nahatohue onihi onihi cajimanadsapa pohuadenijine passo tohuemene tojajaro. Ocasserehe onihi, onihi naqui dsama nemanehedsa inanaridsamanajaro. Pohuadenipa: —Ijine madija ocasserani ahuamanana -quinadsapa nema inanamanadsanapojaropaji.

<sup>7</sup> Dio Atti ecomera-ridsamanajaro jicanissa tad-sapi bani siri imehi jidsabote nami odini huaji tanihuaji qqenadsapa pohuadenidsa ssonarihitohui. Pohuana deni tojadsapa inapamajonahitohui. <sup>8</sup> Nadsapa ia Medsede ahua porimacosanidsa coba idsanamanadsa dsoqquehicca odsa pananicca jahuidsas assiredeni pparahi codahitohui. Najaro odsa panani oninipi Jerosare naraha onini ponimacca hua quinajarona: Imasiri sseqquiri najaridenicca odsa panani Sodoma,

quiquinanajari. Onini onihi naqui: Diodsa ibo-  
qquiri najaridenicca dsama Ejito, quiquinana-  
jari. <sup>9</sup> Nahidsa huada 3 denima huada arobeni  
assiredeni codajari qquide madija jahijonana  
canahitohui. Madija panahicca ohuaha ohuaha  
naridsamanajarideni mota, madija huapideni  
onihi onihi cajiridsamanajarideni mota, tohuatti  
onihi onihi cajiridsamanajarideni mota, dsama  
onihi onihidsa madiridsamanajarideni mota  
jahijonana canahitohui. Najarideni huapimapa  
ppa idsabaqquimana-jarahijine eccocobaqqui-  
manahitohui. <sup>10</sup> Dio Atti cacomeraqquiri najari-  
deni pamahapa ajijaro dsamacca madijadenidsa  
oppinehe imeni inanaridsamanajarojine po-  
huadenidsa nacasseraqquiri najari. Nadsapa  
topamajonajarijine madijapa huatidsemaneri  
nahitohui. Catidserara canadsapa pohuadeni  
dsepetaji pohuadeni tessedsa manaconi jirehe  
ahuaji da, ahuaji da quinahitohui.

<sup>11</sup> Naraha huada 3 denima huada arobeni ji-  
cadsapi Diojine camitemani-manadsa totehema-  
manajari. Nadsapa madija huapima cat-  
tomama canajarideni cappinamanahissa tajari.

<sup>12</sup> Nadsapa aja Dio Atti cacomeraqquiri najari-  
deni pamahapa memehujicca atti mohui daco-  
raha mittamanajari. Pohuadeni pamahadsa: —  
¡Nija, ahuaji ticadamacossaji! —najari. Nad-  
sapa pohuadeni huadide cattomama canaraha  
meme essenima quejemamanaha tohuedama-  
cossajari. <sup>13</sup> Naneje amadsati namidsadsa imeni  
tojadsapi odsa panani mota barari-ridsadsapi  
catojaridsajaro. Najarojine madija 7 mil (7,000)  
quinaha jicajari. Nadsapa tocassiejerajaridenia

cappinamanadsa: —Memehuaaji madijaripa Dio dacorahi, deni tojahi –quinajari.

<sup>14</sup> Nadsama ajijaro dsamacca madijadsa ima oppina tajaro pamehe jicaporaha nidsa onihi tojapomaccanitohui.

*Diocca dodosse 7'cca jei jei najari*

<sup>15</sup> Diocca dodosse tabaqqui 7'cca jei jei nanaja memehuaaji attideni mohuiqquiri naha huati huati toquinajari:

—Jidapapi dsama huapima ia Medsede Diocca cacahuehe toja,

Cristo-Mesiacca cacahuehe toja najaro.

Pohuadenina dossede nama dsanapomanahitohui –quinajari.

<sup>16</sup> Nadsapa cacahuadedeni 24 quinaha Dio tedsejema tamedenicca huihuittaridsa jassi tarijaridenipa pohuadeni pitodsa jassi tadsa tocattedsa-ridsamanadsa panodeni namidsa bacco taridsadsapa Diodsa huatidsemanajari.

<sup>17</sup> Nadsa attidenipa:

—Ia Medsede Dio Tiapi dacorabote ojari tani.

Tiapi nadsama timadipojaropi timadi-dsanapojaro.

Tiadsa etidsejaro, ima bicani tinanani.

Aji ticca dacorehe huapimadsa tijine ahuato tinanaridsajaro.

Jidapapi dsama huapima dossede tijajaro.

<sup>18</sup> Nadsapi dsama onihi onihi naridsajarocca madija tiadsa huadimanajari.

Naraha jidapanana ticca huadie tojaridsanijinecca huada bacco tani.

Nadsapa jicamanapojaridenicca ima pohuadenidsa huati tinadsapi poccadeni imasiri manaconi pohuadenidsa najidsohue tinassonari-ridsanitohui.

Naraha ticca medse Tetti cacomeraqquri najaridenidsapi manaconi bicabote da tinaridsanitohui.

Tiadsa toquejenajari huapimadsa naqui da tinaridsanitohui. Najaro manaconi bicabote da tinaridsajaropi ajamani toquejenajaridenidsa, deni toquejenajaridenidsa aja huapima tinoppine cappinamanadsa Tet-tidsa iboraqquri najaridenidsa tinanaridsanitohui.

Jidapana naqui ajijaro dsama inatabaccoraridsa-manajarodenicca tabaccorehe manaconipi pohuadeni tinajicahitohui -quinajari cacahuade 24 quinajarideni.

<sup>19</sup> Nadsama memehujicca Diodsa dada toqquimacca noccobiji tohuabajaro. Najaro bodidsapi Moisesicca madija Dio Pohua tedseje jehe canirejaricca baho cahato najaro. Nadsapi ssiehe canaridsajaro, mohuini imeni tomohuiridsajaro. Ttottorode ttororo canaridsajaro, nami naqui dsadsa najaro. Passo ccara tojani naqui jadsirema catojaridsajaro.

## 12

### *Amonejicca ima, Huama imehibotecca ima*

<sup>1</sup> Ima nahatoqquri inanijine memehujicamehujicahuatojaro. Ponicca eteropi pina maji ssiejenessa nehe huedsajaro. Abadsico tetepidsa huarijaro. Tatinidsa tamine taticca

huittarijaridsa abadsico bedi 12 canaha cajihuanijari. <sup>2</sup> Najaro amonejepi idsonidsa ejedeni huittidsajari. Tossonahijine comadsapa johua johua najaro. <sup>3</sup> Dsotode naqui memehujicca ima onihi nahatoqquiri inanijine ohuadsa ahuatujaro. Qqui onanaja pina huama imehibotessa naraha jidsa tajari. Macco tajari. (Caria attidsapa: dragón, quinajari.) Tatipa 7, ori 10 najari. Tati 7 najarotsa tamine taticca huittariridsajari. <sup>4</sup> Nadsapa huama imehibotepa abadsico bedi mota (Caria attidsapa: tercera parte, quinajari) pohua dsoporidsa jadsirema johue inaronabaqquidsapa namihuaji hua inaronabaqquijari. Nadsapa huama imehibote amoneje idsoni comajaro tadsajanima huajari. Ejedeni tossonadsapa amadsati jipahijine najorajari. <sup>5</sup> Naraha ponicca ejedeni maqquideje bedi tossonadsapa madijari. Najaripa nidsa dsotode dsama huapimacca tamine dacorabote tojahitohui. Pocca dsodsojo ccanaja tajaridsa pocca madija dosse dosse nahitohui. Naraha ponicca ejedenipa todinimacossanijari. Nahi Dio Pohua huittarihidsa dossede huittarijari. <sup>6</sup> Naraha imenipi dsama huamoni ssono caji, siba caji tanihuaji joppa tajaro. Aji poni joppa tanihuaji madinijinepi Djotine najorapojaro. Nanihuajipi taparini cajidsanaponijine huada 1,260 nehe madijaro.

<sup>7-8</sup> Dsotodepi meme napicossanidsa jadsire tojani qqui onajaro. Diocca dodosse tabaqquidenicca tamine Miqueopa pocca dodosse tabaqqui tedseje huama imehibotedsa jadsire inanamanajaro. Huama imehibotepa

pocca dodosse tabaqquma Miqueocca  
 dodosse tabaqqi tedseje cahadiremanaraha  
 huamadenipa deni toquejenahijine pajiramana-  
 jarahi. Memehuaji madimana-pomahijinepa  
 jicani. <sup>9</sup> Nadsapa huama imehibote cco  
 inaronamanajari. Najari huama imehibotepa  
 maittaccadsama pina maccassa naha  
 ahuatopojari. (Najarina Adana Ebadeni  
 icamaisa-baqqipojari.) Pohua oni ohuahapa:  
 Diocca huadi Satana, quiquinajari. Pohua,  
 pocca dodosse tabaqquma namihuaji hua  
 inaronamanadsapa namidsa catojaronajari.  
 Nama nadsapa dsama huapimacca madijadsa  
 maidsa maidsa nanaridsa najari.

<sup>10</sup> Nadsapi memehuaji tohuatti mohuini omit-  
 tataro attipa:

—Jidapanana ia Medsede ia tonassiajabaqqui-  
 hicca ima bacco tani.

Jidapanana Diocca dacorehe, pocca cacahuehe  
 iadsa ahuatoto tani.

Dio pocca Cristo-Mesia pohua dosse dosse  
 nahicca ima bacco tani.

Ajana, imecotedeni tahimari pohuama huatijide  
 rabote Satanapa coro inaronajari.

Dsome, ssiaja, dsome, ssiaja icca Abi Dio ted-  
 sejema imecotedenicca ima huati huati  
 nanaja naraha jidapapi pocca ima jicani.

<sup>11</sup> Imecotedenipa deni toquejenajari. Satanapa  
 ajamani tojahi.

Edede Bedi Jeso dsoqquedsa emene toccarijine,  
 pohua tahimari ecomeraridsa-manajarojine  
 naco deni toquejenajaripaja.

Pohuadenipa dsoqqehe noppineni  
cappinamana-jarajari.

“Idsoqquedsa naqui bica tani. Dio inebo-  
jarahitohui” quiquinanajari.

<sup>12</sup> Nadsama memehuaaji timadimanajaro  
huapimapi tetidsemaneri naji.

Naraha aji namihuaaji timadimanajaro, passo  
imenihuaaji timadimanajarodenipi tohuati  
nahanacquiri tiquinani.

Tiadenidsa ima oppina tehe tojaridsanitohui.

Diocca huadipa tiadenidsa huadihijine toccaron-  
ajari.

Pocca ima jicabote nani nahato tadsapa huadie  
imeni cajijari

-najari memehuaaji tohuatti mohuini omittajaro.

<sup>13</sup> Huama imehibote bodi huatodsapa: —A,  
namihuaaji ohua coro naronajariraha -najari.

Nadsapa amoneje ejedeni maqquideje bedi cajije  
najaro inanadsoqquenijine qquidso qquidso nar-  
idsajari. <sup>14</sup> Naraha amoneje huaji tani toccani-  
jinepi pina ssibiri imehibote eppessa najari ca-  
pamaha da quinajari. Nadsapi poni madinijine

dsama huamoni ssono caji, siba caji tanihuaaji  
huama huaji tahihuaaji toccanijine appani caji-  
jaro. Nanidsapi poni ecahuamana-dsanapodsa

huajano 3 denima huajano arobedsa madini-  
jine. <sup>15</sup> Naraha huama imehibotepa amoneje  
toccanijine najorani qqui tadsa pohua ajaridsa

passo motarema capiri inajaro, hueni tocajadsa  
totabonijine. <sup>16</sup> Naraha namipi amoneje acco  
icamajaro. Nami odini tohuabajaro. Pina ajarini

cajijarossa najaro. Nadsapi huenicca passo  
nemaneha dappi idsimajaro. <sup>17</sup> Nadsapa huama

imehibote amonejedsa denima huadi tadsapa poni potemanidsa jadsire inananijine toccajari. Aja Diocca dossenijidsa iboraququiri najari, Jesocristo tahimaridsa disseraququiri najaridenidsa jara jara najari. <sup>18</sup> Nadsapa huama imehibote passo imenicca ssiquidsa huajari.

## 13

### *Bani siri jidsabote passo imenidsa qqemorajari*

<sup>1</sup> Ocattoma cananaja bani siri imehi jidsabote passo imenidsa qqemorajari. Tati 7, ori 10 naha cajijari. Ori huapimadsa tamine tatidenicca huittariridsajari. Bani siri tati huapimadsa tohuaoni tabaccora tanicca dsodo naridsajaro. Tohuaonipi Diodsa ocassera tani. Pina Dio onidsa tatamasso najarissa najaro. <sup>2</sup> Bani siri jidsabote qqui onadsapa assire pina dsomaji jano potahissa naraha amoripa pina bani siri imehi oso amorissa najari. Pohua ajari naco pina dsomaji huahuade ajarissa najari. Huama imehibotepa bani siri jidsabotedsa pocca dacorehe da inajaro. Pocca huihuittari bicabote naqui pahuadsa da icanajaro. Najarodsa huittaridsa dossehe dacoraniccadsa dossede tojahijine huama imehibottecca dossehe bani siri jidsabotedsa da inajaro. <sup>3</sup> Bani siri jidsabote tati 7 naraha tati ojariepi biqueradsa pina dsoqquejarossa najaro. Naraha bejorini ccaqquidsapi camittemanijaro. Nadsapa dsama

huapimacca madija huajo caniredsa pahuato-  
hui disseraqquri najari. <sup>4</sup> Huama imehibot-  
edsa huatidsemanajari, aja bani siri jidsabot-  
edsa pocca dossehe da inajarojine. Bani siri  
jidsabotedsa naco huatidsemanajari. Pahuadene  
attipa: —Bani siri jidsabotepa dacorajari. Pina  
aja pahuassa najari nohuerahi. ¿Nejecojarina  
pahuadsa ssonaridsa deni tojahijine pajirahi?  
—quinajari.

<sup>5</sup> Bani siri jidsabotepa Diodsa tatamasso  
nadsapa: —Dio nohuerahi, ohuana huapimadsa  
deni ojani ojari onani —nanaja najari. Naraha  
Diopa bani siri jidsabote dossede tojahijine  
ecossa-geraccajaro. Abadsico 42 canaha  
dossede tojacajari. <sup>6</sup> Nadsapa atti tabaccora  
tadsa Diodsa atti atti dsanapojari. Dio  
oni ajimani inanajaro. —Diocca mamadi  
tabaccora tani —nanaja najari. Memehuaji  
madimanajaridenidsa naco tatamasso najari.  
<sup>7</sup> Nadsapa bani siri jidsabotecca ima huacossa-  
geradsapi Diodsa toquejenajarideni tedseje  
cahadiremana-dsanapojari. Deni tojadsapa  
motapa inajicaridsajari. Nadsapa madija  
huapideni onihi onihi cajiridsamanajarideni,  
tohuatti onihi onihi cajiridsamanajarideni,  
dsama onihi onihidsa madiridsamanajarideni  
naco bani siri jidsabote pahuana dosse dosse  
najari. <sup>8</sup> Ajijaro namidsa madiridsamanajarideni  
camittehe cajimana-dsanapohuijinecca  
papeodsa onideni dsodo nani nohuerajaripa  
bani siri jidsabotedsara huatidseridsa-  
manajari. Najaro papeo dsodo nanipi dsama  
nahatoponidsama Edede Bedi Jeso pahuana

ecahuajaro. Pahuana camittehe issiajanicca icajiridsanijine dsoqquejari.

<sup>9</sup> Teribodeni ticajimanadsapi ohuatti timittamananissa taji. Bani siri jidsabote tamine tojad-sapa Diocca madija ajama quinahitohui:

<sup>10</sup> Diocca madija toponi cocorodsa hua tod-simahijinepa itadamamanadsa hua tod-simahitohui.

Diocca madija huahuajinadsa itahuajinamanahijine naco huahuajinadsa tojicahitohui.

Najaro ima tojadsapi Diocca madijapa ajama quinahitohui: Oppinani ahahuamana naraha Diocca dacorehema mohuaradsa ihinahanamana nanitohui. Ocasserani ahahuamana naraha Diodsa jehe quinahi nebomana-jarahitohui.

*Bani siri ohuaha namidsa qquenajari*

<sup>11</sup> Qqui onapomanaja bani siri ohuaha namidsa qquenajari. Ori pamajari, pina edede bedi orissa najari. Naraha pohua attipa pina huama imehibote attissa najari.

<sup>12</sup> Pahuapa tahidecca bani siri jidsabotecca dossehe cajijari. Nadsapa namihuaji dossede tojadsa aja tahidecca bani siripa cattade huajari. Nadsapa bani siri dsotodeccana namidsa madiridsamanajarideni huapima tahidecca bani siridsa huatidsemanahijine icadossebaqqijari. Aja pohuadsa huatidsemanajaripa tati biqueradsa dsoqqueraha bejo ccaqquidsa camittemanijari.

<sup>13</sup> Bani siri dsotodecca naco canahatori canajari. Pahuajine memehuaji jororoni ccaronadsa namidsa bacco naronajaro. Madija huapima qqui toquinajari.

14 Namihuaajicca madija icamaidsabaqquihissa tajari. Tahidecca bani siri jidsabote cattade huahihuaaji canahatoriri canadsa madija huapima pocca maidsehedsa pajissa quinajari. Pohuadeni icadossebaqquidsapa tahidecca bani siri jidsabote corime sibadsa inahatomanajaro. Najari bani siripa massito jadsira tocanajarodsa tati biqueraraha madicajari. 15 Naraha bani siri dsotodeccadsa dacorehe da inadsapi tahidecca bani siri corime camitta inanajari. Camittemanidsana atti cajidsapa pohua corimedsa huatidsemanajarajarideni huapimapa jicaridsahijine icadossebaqqujari. 16 Nadsapa bani siri dsotodeccana denima ima inanajaro. Madija huapima tahidecca bani siricca nanajanodsa inajanoridsahijine icadossebaqqujari. Ejedeni, jadahi, dsepe sseqquiri najarideni, cappiramanajarideni, madijacca dodosse toquejena-jarajarideni, madijacca dodosse toquejenajarideni huapima inajanoridsajari. Motapa dsepedeni nahatonihuaaji inajanoridsa, motapa assaridenidsa inajanoridsa najari. 17 Aja bani siri jidsabotecca nanajano madija motapa pohua oni dsodo nani cajiridsamanajari. Motapa pohua onicca numero dsodo nani cajiridsamanajari. Madija pocca nanajano cappiramanadsapa mitta quinahijine ssamo, da quinahijine ssamo tanitohui.

18 Ajijaro ima nahatoqquiri tiquinanijinepi madija Diocca nahatohue cajijari bodi nahato tajarina bani siri jidsabotecca numero inatas-saqquina. Pocca numeropi madijadenicca. Na-

jaro numeropi 666 najaro.

## 14

### *Edede Bedi 144 mil quinajarideni tedseje*

<sup>1</sup> Nadsapa ocattoma cananaja Edede Bedi Jeso ssono Siodsa hua canahi qqui onade. Pohnadsa madija 144 mil (144,000) quinaha domo huajari. Assaridenidsa dsodo nanipi Edede Bedi Jeso oni, Imehi oni cajimanajari qqui onajaro. <sup>2</sup> Nadsapi memehuaji mohuini bica tehe omittajaro. Pina hueni huapima ssahaha canajarossa najaro. Pina ttottorode dacorabote mohuinissa najaro. Pina titirededeni huapi taha tire tire quinajari mohuissa najari. <sup>3</sup> Nadsapa 144 mil quinaha ajie dsati jiri jiri quinajari. Pohnadenipa Diocca huihuittari bicabote tadsajanima aja camittaqquri najari 4 quinajari tedsejema, cacahuadedeni 24 quinajarideni tedsejema jiri jiri quinajari. Madija ohuahadenipa poccadeni ajie tocatherahijine ssamoqquri naraha 144 mil quinajaridenira najaro ajie jiride nahatoqquri najari. Najaridenipa ajijaro namidsa madimanasporaha Dio idinibaqquipojari. <sup>4</sup> Poccadeni ima ssiaja tajaro. Huananehe jirehe madimanasjari. Amonejedsa ssamoqquri najari. (Najaro imapi dio pohnamaccadsa huatidsemanajarajari.) Edede Bedi Jesodsa disseraqquri nadsapa pohnadsara ahujai jai toja, ahujai jai toja naridsajari. Najaridenipa namicca madija mota Dio idinibaqquipodsa Pohnadsa toquejenahissa, Edede Bedi Jesodsa toquejenahissa tahijine pina madijadenicca daniji bicabote Diodsa

tojajarissa quinajari. <sup>5</sup> Pohuadenipa maidsehe huatiraqquiri najari. Imasiri cappiramanaha madimanajari.

*Diocca dodosse tabaqqi 3 quinajaridenicca ima*

<sup>6</sup> Nadsapi Diocca dodosse ohuaha qqui onade. Memehuaji ccahuajadsa Dio ia tonassia-jabaqquihijinecca ima eccahuajajaro, namidsa madimanajaridenidsa huati taridsahijine. Aja madija dsama onihi onihidsa madiridsamanajaridenidsa huati, madija huapideni onihi onihi cajiridsamanajaridenidsa huati, tohuatti onihi onihi cajiridsamanajaridenidsa naco huati naridsahijine. <sup>7</sup> Nadsapa pohua atti mohui tadsa huati tajari: —Dio noppine ticappinamanaji. Diodsa: “Tiana deni tijani” tiquinaji. Dsama huapimacca madijacca imasiri manaconi najidsohuepi Dio Pohuajine tojabote nani. Pohuana meme inahato, nami inahato, passo imeni inahato, passo sibadsa qquenanicca inahato naridsajaro. Pohuadsara tetidsemanaji –najari.

<sup>8</sup> Dsotode Diocca dodosse ohuaha toccamisajari. Pohua attipa: —¡Odsa panani deni tojanicca Babironiapi jicani, jicani! –najari. —Najaro odsa pananicca madijajinepi dsama huapimacca madija Diodsa huatideni ajamanadsa Babironiadenicca huananehedsa toquejenaridsajari. Babironiadenipa Diodsa iboqquri nadsa poccadeni ibohuepi dsama huapimacca madijadsa dsapa taridsajaro. Pina noccodeni janoqquri nahijine dsedse coma tanicca da icanabaqquijarissa najaro –najari.

<sup>9</sup> Dsotode Diocca dodosse 3'cca toccamisadsa atti mohui tadsa huati tajari: —Bani siri jidsabotedsa, pohua corime nahatohuidsa madija huahuatidsemana najaridenipa Diocca najidsohue inahanamananitohui. Bani siricca nanajano cajimanahijine iboraqquri nadsapa assaridenidsa cajimana, dsepedenidsa cajimana najaridenipa Diocca najidsohue inahanamananitohui. <sup>10</sup> Pohuadenidsa Dio huadidsapa najidsohue imeni najorajari. Diocca dodosse tabaqqui, Edede Bedi tedseje pohuadeni cattomama canahihuaji Dio nanajidso inanabaqquidsa jororoni azufre quejemanicca inahanamananitohui. <sup>11</sup> Najaridenipa bani siri jidsabotedsa, pohua corime nahatohuidsa huahuatidsemana najari. Bani siricca nanajano cajimana-jarahijine poni quina-jaradsa pohuadenipa dsippo jororonijine ocasserani ahuanadsapa dsome, ssiaja, dsome, ssiaja jassi quina-jarahitohui —najari.

<sup>12</sup> Najaro ima tojadsapi Diocca madijacca ima ahuato tanitohui. Diocca madijapa oppinani ahahuamana naraha Diocca dacorehema mohuaradsa ihinahanamana nanitohui. Najaridenipa Diocca dosseniji inapajiramananissa tajararo. Jesocristodsa naco disseraqquri najari.

<sup>13</sup> Nadsapa memehuai atti omittajaro. Ohuadsa ajama najari: —Ajijaro ima bicani dsodo taji —najari. —Aji jidapanaccadsama ia Medsede Jesocristodsa toquejenajarideni jicamanapodsapa pohuadenidsa ima bicani tojanitohui —najari.

Nadsapa Dio Corime attipa: —Jehe, najarideni

tojicadsapa jassi quinahitohui. Najo tanicca dsepedeni ihijimana najaro jicani. Aja Diodsa dsepedeni ijimanadsa pohuadenijine ima bicani tojajaroma memehuaaji jai tojamacossahitohui -najari.

*Namihuajicca bono naccadecca ima*

<sup>14</sup> Nadsapi ocattoma cananeje meme essenì nopo tani qqui onajaro. Najaro essenì tetepidsa huittarijaripa pina madijassa naha qqui onajari. Pohua tatidsa tamine taticca oro nahatoni huittarijaro. Pohua dsepedsa massito jocacadsani jadsira tocanehè dsojo icajidsajaro. <sup>15</sup> Diocca dodosse ohuaha Diodsa dada toqquimahuaji qquenajari. Pohuapa aja meme essenì noponi tetepidsa huittarijaridsa jadsirema huati tajari: —Ticca massito jocacadsanidsa bono huissi tippiridsajo. Jidapanana dsama huapimacca bono jadabote tojahi, naccahi bica tahi -najari. <sup>16</sup> Nadsapa dsotode meme essenì noponi tetepidsa huittarijaripa nami tetepidsa pocca massito da icanadsa bono tajoppiridsadsapa inaccajari.

<sup>17</sup> Nadsapa Diocca dodosse ohuaha memehuajicca Diodsa dada toqquimahuaji qquenajari. Najari naco dsepedsa massito jocacadsani jadsira tocanehè dsojo icajidsajaro. <sup>18</sup> Nadsapa memehuaaji Diodsa da tahijinecca huahuanari cahit-tarinihuaji Diocca dodosse ohuaha naco qquenajari. Pohuapa dsippo jororoni jinede. Nadsapa aja massito jocacadsani jadsira tocanehè dsojo tocajidsajaridsa atti mohui tadsa huati tajari: —Namicca ppa nahi uva bono jadabote tojahi.

Ticca massito jocacadsani jadsira tocanajarodsa uva dsepema namanaha huissi tippiridsadsa tinaccaridsajo –najari.

<sup>19</sup> Nadsapa Diocca dodosse nami tetepidsa pocca massito da icanadsa namicca uva bono huapima tajoppiridsadsapa inaccajari. Nadsapa uva ppejene tojahijine siba odini imenibotedsa hua idsajari. Nahidsa uva ttai ttai najaricca imapi Diocca huadie madijadsa tojanijinecca ima. <sup>20</sup> Nadsapa odsa panani huapihuaji uva ttai ttai nadsa ppejene toccajari. Najari ppejene toccajaripa madija emenedeni uva ttaittaidsa qqjenajaro. Pina hueni tocadsajajarissa najaro. Bojo huahi dequeraraha ajaridsa bacco tajaro. (Najaropi 1 metro y medio.) Emenedeni tocabaqquini huaji tani. Nattome inadsapi 300 kilometrossa nehe tojajaro.

## 15

*Diocca dodosse tabaqqui 7 quinajari Dio icadossebaqquidsa najidsohue 7 najaro najoramana-jari*

<sup>1</sup> Memehuaji qqui onaneje itedsejemacca ima onihi denima jidsa tehe ahuatoni qqui onadsapi huajo onajaro. Diocca dodosse tabaqqui 7 quinaha ahuatomanajaripa najidsohue oppina tanicca 7 nehe madijadsa tojaridsanijine najoramanajari. Najaro najidsohuepi jicanicca. Nidsa najaro najidsohue 7 nehe tojaridsani nattinipi Diocca huadie jicanitohui.

<sup>2</sup> Nadsapi coridsa imenissa najaro naqui qqui onajaro. Pina siba cristaossa najaro tocassieje-qquimera naraha jororoni quejemajaro. Nani coridsassa najarodsa madija domodeni huari-jaripa Diocca daniji titire oni arpa dsojo dsojo to-jidseri najari. Najaridenipa bani siri jidsaboteca imadsa dsori tocaniredsa deni toquejenajari. Bani siri jidsabotedsa pohua corimedsa naco jehe quina-jarajari. Pohua onicca numero pohuadenidsa nohuerani. <sup>3</sup> Nadsapa titire arpadsa tire tire quinadsapa Diocca medse Moisesicca ajie, Edede Bedi Jesocca ajie jiri jiri quinajari. Ajiepi ajima canajaro:

—Jehe Abi Dio, nahatojide tijirani.

Tinahatoridsajari huapimapa bica tahi.

Tiapi ia Medsede dacorabote tijani.

Ticca cacahuehepi toccanissa tani.

Ticca ima huapimapi pajissehe ponira.

Dsama nemanehedsa madiridsamanajarideni cacahuade ojari tajaro.

<sup>4</sup> Jehe ia Medsede Dio, nidsa huapima tinoppine cappinaridsa-manahitohui.

Huapimapa Tiadsa: “Bica tinani, deni tijani” quinahitohui.

Tiana ojari tani. Tibodi ssiaja, huire tani.

Ticca ima pajiranissa tajaro qqui toquinadsapa dsama nemanehedsa madiridsamanajarideni

Tiadsa huatidsemanahijine jahijonana canahitohui –quinajari, jiri jiri quinadsa.

<sup>5</sup> Najaro poccadeni ajie jicadsa ocattoma cananeje memehujicca Diodsa dada toqquima bodihuaji tohuabajaro. <sup>6</sup> Najaro Diodsa dada toqquima bodihuaji Diocca dodosse tabaqqui <sup>7</sup>

quinaha jai tojenajari. Pohnadenipa najidsohue oppina tanicca 7 najaro cacahuadedeni. Etero onini lino bica tajaro, nopo, dsibehi tajaro huedsamanajari. Ssoquerideni orocca biji metedenidsa bacco tajaro.

<sup>7</sup> Nadsapa camittaqqiri najari 4 quinajarideni ojariapa Diocca dodosse tabaqqi 7 quinajari-denidsa tasao orocca pohnadenidsa da icanaridsajari. Najari tasaodsapi Dio camitta taha madi-dsanapojaricca huadie tojaridsanjine najidsohue comabote ijiridsajaro.

<sup>8</sup> Nadsapi memehujicca Diodsa dada toqquima bodihuajipi Djotine pocca deni tojehe, pocca dacorehe ahuato inanajaro. Pina dsippo essenissa najaro ijiridsajaro. Nanihuajipi toqquedsimade ssamo taccani. Aja tasao 7 canajaricca najidsohue comabote tojaridsanjine namihuaji Diocca dodosse tabaqqi 7 quinajari sso inaronamanehe jicadsana toqquedsimade topineranitohui.

## 16

*Tasao 7 canajaridsa najidsohue ijiridsanicca ima*

<sup>1</sup> Nadsapa Diodsa dada toqquima bodihuaji atti mohui dacoraha omittajaro. Pocca dodosse tabaqquidsa huati tajari: —¡Jari, jai tijaji! Jidapanana ojine ticcadeni tasaodsa najidsohue oppina tanicca ijiridsajarodsa onajidsobaqquihijine namihuaji sso tinaronaridsamanaji –najari.

<sup>2</sup> Nadsapa Diocca dodosse tahidecca toccajari, pocca tasaocca namihuaji sso inaronajaro.

Nadsapa namihuaji madija huapima bani siri jidsabote janoma jahiridsajari pohua corime nahatohuidsa: —Ia cacahuade -quiquinanajari-denipa joro jadsidsi comene dacorahicca inahanamanajari.

<sup>3</sup> Nadsapa Diocca dodosse dsotodecca naco pocca tasaocca passo imenihuaji sso inaronajaro. Nadsapi passo tohuemene tojajaro. Pina madija pohua tessejine dsoqquedsa emene toccabaqquijarossa najaro. Nadsapa passo abari huapima cacotaridsajari.

<sup>4</sup> Dsotode Diocca dodosse 3'cca naco pocca tasaocca sso inaronadsapi huenicca passo, bi-jinicca passo, sibadsa qqenajarocca passo naqui tohuemene tojaridsajaro. <sup>5</sup> Nadsapa Diocca dodosse passo cacahuade atti omittadsapi ajama najari:

—Jehe ohua Medsede Dio, tibodipi ssiaja, huire tajaro.

Jidapana naqui timadini, Tiapi dsama tinahatojeraccadsama timadipojaro.

Madija tinajidsobaqquidsapa tijine pajiranissa tani.

<sup>6</sup> Pohuadenijine ticca madija Tiadsa bicaqquiri najarideni jicaridsajari.

Tetti cacomeraqquiri najarideni naco inajicaridsa-manadsapa emenedeni toccaridsajaro.

Jidapapa manaco tohuemene dse quinahijine pohuadenidsa da tinajaro.

Najaropi poccadeni ima manaconi -najari.

<sup>7</sup> Nadsapi Diodsa da tahijinecca huahuanari-huaji tohuatti mohuini qqenani omittajaropi

ajima najaro: —Jehe ohua Medsede, Tiapi Dio Dacorabote, ticca pajissehema poccadeni ima nattome tadsapi tijine pajiranissa tanitohui –nade tohuatti mohuini.

<sup>8</sup> Diocca dodosse 4'cca naco pocca tasaocca majidsa sso inarijaro. Nadsapa maji icadossejari, pohua ppocone dacoradsa madija camanahijine.

<sup>9</sup> Madija huapima camanahissa taraha Diodsa bodideni cacajiqquimera-jarahi. Pohuadsa: — Deni tijani, nahatojide tijirani –quina-jarahi. Najidsohue comabote epeje inananijine Dio pajiraraha Pohua onidsa tatamasso quinajari.

<sup>10</sup> Nadsapa Diocca dodosse 5'cca naco pocca tasaocca bani siri dossede tojahijinecca huihuittaridsa sso inaridsapi pocca cacahuehe nemanehetodsidsijaro. Nadsapa pohuadenidsa comani dacoradsa pohuadeni ipoma inodeni dsaqui tocanamanajari. <sup>11</sup> Comaqquri naraha poccadeni tabaccorehe nebomana-jarajari. Imedeni jadsijaro comani ahuamanadsapa Dio memehuari madjaridsa tatamasso quinajari.

<sup>12</sup> Nadsapa Diocca dodosse 6'cca naco pocca tasaocca huani imehi Eoparatedsa sso inaronadsapi sse tocanajari. Tada tocanadsapa maji ccajonahihuaajicca tamedeni poccadeni madijama jahiqquimahijine pajiramanajari.

<sup>13</sup> Nadsapi ocattoma cananaja huama imehibote ajaridsa qqenahi qqui, bani siri jidsabote ajaridsa qqenahi qqui, bani siri ohuaha maidsehe mamaride ajaridsa qqenahi qqui onajaripa tocorime siri 3 quinaha pina torocacassanaha qqenaridsajari. <sup>14</sup> Najaridenipa Satanacca

dodosse tabaqquideni. Pohuadenipa canahatori-mana canajari. Dsama huapimacca tamedenedi madiridsamanahihuaaji jai tojabagquijari, jadsiretohui inequeriqqui-bagquimanaridsahijine. Diocca huadie imeni tojaridsanijinecca huada bacco tadsapi tamedenedi poccadeni soldadodeni ima Diodsa jadsire inanamananijine. Najaro huadadsa Dio Dacorabote deni tojahitohui.

<sup>15</sup> Najaro imapi Jesocristo ia mari tocanabaqquidsa ajama napode: —Pina ticca odsadsa bobotide qquedsimahijinecca huada ssamoqquiri tiquinajarossa nanitohui. Ohua occanipomanicca huada ssamoqquiri tiquinani. Nadsapi tibodideni huatomananissa tadsa tiadeni tecahuaridsamanaji. Pina ticcadeni eteroma tinoccodeni barijarossa tiquinaji. Nema tiquinadsapi ima bicani ticajimananitohui. Naraha otohui timadimanageradsa occanipomadsapi pina madija ccoroje cappinajarissa tiquinanitohui —nade.

<sup>16</sup> Nadsama Satanacca dodosse tabaqquidenipa ajijaro dsamacca tamedenedi huapima poccadeni madijama inequeriqquimanajari. Aja inequeriqquimanahihuaicca dsama onini jodiideni atti ebreodsapi: Aramajedo, quinajari. <sup>17</sup> Nadsapa Diocca dodosse 7 quinajari jicahicca pocca tasaocca jappopponihuaaji sso inajaro. Nadsapi memehuaicca Diodsa dada toqquimahuaji atti mohui ahuatojaro. Nahi Diocca huihuittari bicabote cahittarinihuaaji pohua atti mohui tehe qquenajaropi: —¡Jidapapi jicani! —najari.

<sup>18</sup> Nadsapi ssissiede ssiehe canajaro. Mohuini

jidsa tajaro naqui tomohuiridsajaro. Ttottorode naqui ttororo canajaro. Nadsapi nami jadsirema dsa dsa najaro. Madija ajiaro dsamadsa madimanapodsama namidsadsa caji taporaha ajiaro namidsadsapi denima dacorajaro. <sup>19</sup> Nadsapi namidsadsa dacorajarojine odsa panani deni tojanicca Babironia nocconidsa huacca nadsapi arobeni 3 nehe tojajaro. Dsama onihi onihi naridsajarocca odsa panani naqui tohuedimaridsajaro. Diopa Babironiaccia ima huati ajama-jaradsa pocca najidsohue dacorajaro ponidsa inanajaro. Pocca huadie poni dse inanajarossa najaro. <sup>20</sup> Passo imenidsa dsama huihuittidsacosseri najaro, ssono huapima naqui amossi naridsajaro. <sup>21</sup> Nadsapi memehuajicca passo ccara tojani pina sibassa najaro naqui catojaronajaro. Bedeni jerani, pina 40 kilossa najaro. Najaropi madijadsa catojariridsajaro. Nadsapa Diodsa tatamasso quinajari, najaro najidsohue pohuadenidsa oppina tadsa.

## 17

*Amoneje huananehe imeni cajijaropi Diocca najidsohuedsa tojanitohui*

<sup>1</sup> Nadsapa Diocca dodosse tabaqqui 7 quinajari tasao cajimanajarideni ojariapa ohuahuai ccajonadsa huati tajari: —Nija, ticcajonaji. Tiadsa ima ahuato onanana -najari. —Aji amoneje passo tetepidsa huittaritaropi huananari. Ponicca imasiri manaconi Dio inajidsonicca ima qqui tinanijine -najari. <sup>2</sup> —Jehe, dsama huapimacca

taminedeni poccadeni madijama ponicca huananehedsa toquejenaridsajari. Pina noccodeni janoqquiri nahijine dsedse coma tanicca dse naridsamanajarissa najaro –najari. (Ponicca huananehecca imapi: Diodsa huatideni ajamanadsa dio pohuamaccadsa huahuatidsemana najari.)

<sup>3</sup> Nadsapa Dio Corime itedsejemacca ima ohua qqui tonanajari. Dsama huamoni ssono caji, siba caji tanihuaji Diocca dodosse ohua tohuaccajari. Nadsapi nanihuaji qqui onaneje bani siri maccohuidsa amoneje huittarini qqui onajaro. Bani siripa tati 7, ori 10 najari. Pohua huapidsa dsodo nani ijijaro. Najaro dsodo nanipi oppina tani, Diodsa tabaccora tajaro. <sup>4</sup> Bani siri idedsa huittarijaropi etero bicani sohueni macconi quejemani huedsajaro. Mattonicca, huaribonicca, bijinicca, issonicca huapima oro nahatoni cajijaro. Siba bedeni bicabote, perla noponi oro tadsajani quejemani cajidsamaro canajaro. Poni dsapanidsa dsedse oro nahatoni dsojo tojidsajaro. Ponicca dsedsedsa ijijaripa ponicca huananehecca ima. Diodsa ima oppina tanicca, tabaccora tanicca ijinissa tajaro. (Najaro imapi ponicca tabaccorehe, dio pohuamaccadsa huatidsejarocca ima.) <sup>5</sup> Assarinicca dsodo nanipi imittanijine ssamo inaccani. Najaropi ajima najaro: Odsa panani imeni Babironiapi huananehe jinede. Ponicca marinajajine ibohue, tabaccorehe tojaridsadsapi dsama huapimadsa ima tohuajari nadsa tehe tojaridsajaro. <sup>6</sup> Qqui onadsapi obodidsa nahato onajaro: Ponipi nocconi jano tajaro. Diocca madija emenedeni, Jesocristo

tahimari ecomeramanadsa inajicaridsamanajari emenedeni naqui dse nadsapi nocconi jano tajararo.

Najaro ima qqui onadsapi ojabojo najaro. <sup>7</sup> Nadsapa Diocca dodosse ohuadsa huati tajari: —¿Nejecotohui tijabojo najaro? Aji amonejecca ima ahuatora taraha tia onahattana. Aja bani siri tati 7, ori 10 najari pohua idedsa amoneje huittaridsa eccaridsajarocca ima naqui ahuatora taraha tia onahattana —najari. <sup>8</sup> — Aja bani siri qqui tinajaripa tahide madiporaha jidapapa pocca ima jicani. Naraha pohuapa nidsa nami odini huaji taniccadsa qquenahi ojarihithohui. Qquenahi nattipa coridsa imeni jororo cananihuaji pohua dsoqquehicca ima inahana-dsanaponithohui. Nadsapa ajijaro dsamacca madija tahide dsama nahatoponid-sama camittehe cajimana-dsanapohuijinecca papeodsa onideni nohuerajarideni bani siri qqui toquinadsapa bodideni jabojo quinahithohui. Najari bani siripa madipojari, jidapapa madijarahi, nidsa dsotode canajoranipomadsa madija inajabojobaqquihitohui —najari Diocca dodosse ohuadsa.

<sup>9</sup> Nadsapa denima huati huati tajari: —Ajijaro ima timittanissa tanijine najo tani. Diocca tohuattehe cajjarina mittahithohui —najari. —Aja bani siri tati 7 najaricca imapi ssono 7 najarodsa amoneje huittarijaro. Tati 7 najaricca ima onihi naqui tamine 7 quinajari. <sup>10</sup> Najari tamedeni mota 5 quinajaridenicca cacahuehepi jicapojaro. Ohuahapa jidapana dsama cacahuade tojaccahi. Ohuahapa nidsa dsotode dsama cacahuade to-

jahitohui. Naraha najari tamine dsama ecahuard-  
sadsapi huajano huapi tajarahitohui. <sup>11</sup> Bani  
siri tahide madiporaha jidapana nohueracca-  
jaripa tamine 8'cca tojahitohui. (Caria attidsapi:  
octavo, quinajari.) Tamine 7 quinajaridenidsa  
quejemaporaha nidsa dsotode tamine 8'cca to-  
jadsapa coridsa imeni jororo cananihuaji pohua  
dsoqquehicca ima inahana-dsanaponitohui.

<sup>12</sup> —Bani siri ori 10 naha qqui tinapojaripa  
tamine 10 quinajaricca ima. Najaridenicca cac-  
ahuehepi nohueraccani. Nidsa dsotode bani  
siri tedseje dossehe cajimanadsapa maji ojariara  
dossedede toquejenahitohui. <sup>13</sup> Nadsapa tamine  
10 quinajarideni poccadeni dacorehe, poccadeni  
cacahuehepi bani siridsa inanamananijine jehe  
canirere canahitohui. <sup>14</sup> Najaridenina pocca-  
deni madijama Edede Bedidsa jadsire imeni  
inanamananitohui. Naraha Edede Bedipa da-  
corehe deni tojanicca cajijarijine inajicahitohui.  
Pohuadsa toquejenajaridenipa Dio icattejidsa-  
baqquijari. Pohuadsa disseraqquri najari.  
Tamine huapi taraha Edede Bedi Jesopa huapi-  
macca tamine deni tojahicca ojarijari. Madija  
medse totonanadedeni naco huapi taraha po-  
huapa huapima Medsededeni deni tojajari -na-  
jari.

<sup>15</sup> Nadsapa Diocca dodosse denima ohua mari  
canajari. Pohua attipa: —Aji passo qqui tina-  
jaro tetepidsa amoneje huananari huittari cana-  
jarocca imapi madija huapideni onihi onihi ca-  
jiridsamanajarideni, madija ohuaha ohuaha nar-  
idsamanajarideni, tohuatti onihi onihi cajirid-  
samanajarideni, dsama onihi onihidsa madirid-

samanajaridenicca ima najaro. <sup>16</sup> Nadsama bani siripa pohua ori tamine 10 quinajarideni tedseje amoneje huananari ettajomananitohui. Ponicca etero ssiti quinadsapi ccorojani inebo-mananitohui. Poni imani naqui jipamanahitohui, dsippodsa coro idsanamanadsapi ono tojanitohui. <sup>17</sup> Tamine 10 quinajaripa ssamoqquiri naraha Dio Pohua jipa tahicca inanamananijine, bodideni inanajorabaqquijari. Pohnadenipa: “Bani sirina deni tojahi ojari nana” quinadsa jehe canirere canajari. Nadsapa bani sirid-sara iboraqquiri dsanapomanajaria Dio Pohua huati tapojaricca ima jicani bacco toquinahitohui. <sup>18</sup> Nadsama amoneje huananari qqui tinajaropi odsa panani imenicca ima. Najaro odsa pananipi dsama onihi onihi naridsajarocca taminedenidsa dossede tojajaro –najari Diocca dodosse ohuadsa.

## 18

### *Odsa panani imeni Babironia jicanissa tajaro tahimarini*

<sup>1</sup> Ima qqui onapojaro jicadsapi Diocca dodosse ohuaha memehuaji ccaronahi qqui onajari. Dossehe dacoranicca cajijari. Pohua dsi-behinejinepi nami huapima tossiajabaqquijaro.

<sup>2</sup> Nadsapa pohua atti mohui dacoradsa huahua najari:

—¡Babironia jicani, jicani! –najari. —Babironia odsa panani deni tojanicca jicani.

Jidapapa Babironiadsa Satanacca dodosse tabaqqi tocorimedenira madimanahi.

Abaridsa, mori, eppe cajihi oppina tahicca  
huapima madimanahi.

Bani siri huadi tahicca naco madimanahi.

<sup>3</sup> Aji Babironia jicajaropi dsama huapimacca  
madija ponicca huananehedsa toquejenar-  
idsajari.

Noccodeni janogquiri nahijine dsedse coma tan-  
icca dse inanaridsa-baqquijarissa najaro.

Dsama huapimacca tamine Diodsa iboqquri na-  
jarideni ponicca huananehedsa toquejena-  
jari.

Ponicca madija todsepetaji bicabote tohui dis-  
seraqquri, jijipa huaticcara tahicca tohui  
disseraqquri najarijine

dsama huapimacca dadadedeni Babironiadsa  
pohuadeni dsepetaji da da quinadsapa  
dsiniro tosseridsamanajari.

Najaro ima huapimajine Babironia jicajaro

—najari Diocca dodosse atti.

<sup>4</sup> Nadsapi memehuaji atti onihi omittadsapi  
ajima najaro:

—Occa madija Babironiadsa timadimanajaropi  
ponicca imasiridsa tiquejemamana-  
jeranijine jai tijenaji.

Babironiadsa najidsohue ssonarinitohui.

Najaro najidsohue dsori ticanirenijine huajiji  
tinaji.

<sup>5</sup> Babironiaccas madija imasiri inanamanapo-  
jaropi inehemamanajaro.

Pina ssono dequerajaro memehuaji bacco ta-  
jarossa najaro.

Poccadeni ima tabaccora tajaro Dio huati ajama-  
jarajari.

<sup>6</sup> Babironiapi madija inajidso-baqqujari manaco ponidsa najarossa nehe tojanitohui.

Pina ponijinessa nehe denima oppina tehe tinanamanaji.

Madijadsa imasiri inanaridsajaropi pina dsedse bidabote dse inanabaqqujarissa najaro.

Manaco ponidsa denima oppina tehe dse tinanamanaji.

<sup>7</sup> Coma taniijine tinajidsomanaji. Ponipi: “Ohuapi deni ojani” naneje najaro.

Poni dsapanitaji bicabote tohuini disseraqquri dsanapomanajari manacopa ponidsa comani imeni tinanamana-dsanapoji.

Poni bodinidsa: “Ohuapi ajidsa omadijaro, tamine deni tojanicca ojajaro.

Tabira ocaja-jerani. Nanajidso ojajeranitohui” najaro.

<sup>8</sup> Poni attini nema nadsapi Dio Dacorabote attia: “Babironia onajicana” nadsapa ponidsa najidsohue imeni amadsati ssonarinitohui.

Ponicca madija huapi taha comabotedsa caccotaridsahitohui.

Motapa ocasserani ahuamanahitohui. Motapa pemimanahitohui.

Nadsapi Babironia diji tehe jicanissa tanitohui –najari Diocca dodosse.

<sup>9</sup> Nidsa dsama huapimacca tamine, aja Babironiacca huananehedsa toquejenajari, pohuadeni tohuini quinahiccdsa toquejenajari huapimapa odsa panani diji tadsa essenitoccamacosani qqui toquinadsapa oji oji quinahitohui. Pohuadenipa ponitohui oji oji quinahitohui.

<sup>10</sup> Pohuadenipa Babironiadsa najidsohue ssonar-ijaro noppineni cappinamanadsapa huajima cat-tomama canahitohui. Pohuadeni attipa:

—¡Jaho! Babironia tiapi icca odsa panani deni tojanicca dacorabote tijaraha

amadsati ticca imasiri manaconi najidsohue tiadsa bacco tajaro -quinahitohui.

<sup>11</sup> Nadsapa dsama huapimacca dadadedeni naco pohuadeni dsepetaji mittade nohueradsapa ponitohui oji oji quinahitohui. <sup>12</sup> Nadsama Babironia bica taccadsa pohuadeni dsepetaji ehecacajonamana najaropi oro, plata, siba bedeni huatini ccara tanicca, onhipi perla noponi bicabote, etero bicani onihi onihi nehe pina lino, seda, macconi purpura, denima macco tajaro naquí ehecacajonamana najaro. Ahua majoni bicabote cajinicca, elefante ino nahatohui, ahua huatini ccara tanicca nahatoni, ppejo onini bronze nahatoni, ppejo onini hierro nahatoni, siba sseque tajaro onini marmol nahatoni naquí ehecacajonamana najaro. <sup>13</sup> Dsamatapa quequejema canela, dsamatapa quequejema majo tahicca ohuaha ohuaha naco huemahi ehecacajonamana najari. Ahua majiconi tohuessidsa majo bica tajari, ahua onihi majiconi mirra ehecacajonamana najari. Majojo, uva ppejene, ahua bono oribo oquine, harina nappori tahicca, aroso jidsadsa trigo naco ehecacajonamana najari. Bohui, bojo todsepetaji jojorede, edede, bojo madija jojorede, nami jojoppade bojo joca joca ihicana najaro, madija naco ibotibaquimanadsa manaconedenitohui da quinahijine ehecacajonamana

najari. <sup>14</sup> Naraha Babironia jicadsapi dadadedeni ponidsa ajama quinahitohui:

—Jidapapi ahua bono ocassabote tohuini tanicca ticappiranissa tani.

Aji tia ticajjarocca huapima bicabote paji jicarihe nema dsanaponitohui –quinahitohui.

<sup>15</sup> Nadsapa dadadedeni Babironiadsa pohuadeni dsepetaji da da quinapodsa dsiniro ssequiri napojaridenipa ponidsa najidsohue oppina tehe ssonarijaro noppineni cappinamanahitohui. Nadsapa huaji tanidsa domo huadsa oji oji quinahitohui. <sup>16</sup> Pohuadeni atti ajama quinahitohui:

—Jaho, Babironiapi odsa panani deni tojanicaraha jicajaro. Tohuati nahana tani.

Najaro odsa pananipi pina amoneje poni nabica-jarocca imassa najaro.

Etero bicabote lino huedsa, onihi purpura huedsa, onihi macconi huedsa najaro.

Poni nehebedsodsapi oro, siba bedeni dsibehi tajaro, perla naqui mattonidsa, huari-bonidsa, bijinidsa, issonidsa cajijaro.

<sup>17</sup> Jehe poni bodini huato-jeraraha amadsati najidsohue bacco tajaro.

Ponicca dsiniro jica, bicabote jica najaro –quinahitohui dadadedeni.

Nadsapa canoa imenibote jinededeni, pohuadenidsa jahijonajarideni, canoa imeni ahaccadedeni, passo imenihuaji tatarabaidssadedeni huapimapa huajima cattomama canahitohui. <sup>18</sup> Babironia diji tani essenitoccamacossani qqui toquinadsa johua johua quinahitohui. Pohuadeni attipa:

—¡Odsa panani deni tojanicca najarossa najaro nohuerani, nohuerani! –quinahitohui.

<sup>19</sup> Nadsapa ojiejine ocasserani ahuamanahi ahuato tanijine pohuadeni tatidsa ssiqui huira narimanadsa jadsirema oji oji quinahitohui. Oji quinadsa attidenipa:

—¡Jaho, Babironiapi deni tojaniccaraha tohuati nahana tani!

Babironiadsapa dsiniro sseqquiri naha madi-manajari.

Pohuadenijine passo imenicca canoa imeni jinededeni dsiniro huemani cajiridsamanajari.

Naraha huada ojarie amadsati jicani –quinahitohui.

<sup>20</sup> ¡Nadsapi memehuaji timadimanajarodenipi ajijaro odsa panani jicajarodsa tetidsemanaji!

Jesocristocca dodosse tabaqqui, Dio Atti cacomeraqqiri najarideni, Diodsa tiquejenajarodeni huapima tetidsemanaji.

Ponijine nanajidso tiquejenaridsapojaro manaconi jidapanana Dio inajidsojaro.

<sup>21</sup> Nadsapa Diocca dodosse dacorabotepa siba imeni idimacossa najaro. Najaro sibapi imenibote pina aroso jidsadsa trigo ririassa najaro. Najaro siba imeni passo imenidsa coro idsipadsa pohua attipa:

—Babironia tiapi odsa panani deni tijaniccaraha ajijaro sibassa tanitohui.

Paji amossi taridsapi tia qqui quinapomajeranitohui –najari.

22 —Nadsama ticca jahui huapimadsapi titire oni arpa mohui todidi, totore mohuini todidi, jei jei mohui todidi nadsapa madija mittamanapoma-jarahitohui.

Ticca tatarabaidadedeni naco amossihuahitohui.

Trigo riria mohuini naqui todidi nanitohui.

23 Tiadsa jojororo ssiejene naco nohuerahitohui. Cacajirehicca ejete mohuini nohueranitohui.

Ticca todsepetaji dadadedeni dsama huapimadsa deni toquejenaraha jicanitohui.

Tiapi dsama huapimacca madija ticamaidsabaqqui-ridsajaripa

pina dsoppineje madija icamaidsabaqquijarissa tajarojine paji amossi tarinitohui –najari.

24 Jehe, najaro odsa pananidsapi Dio Atti comeraqquri najarideni inajicaridsamanajari. Diocca madija toquejenajarideni naco inajicaridsamanajari. Aja dsama huapimacca madija ijinedeni ahuamanadsa emenedeni toccaridsajarojine Babironiadsa Diocca najidsohue ssonarijaro.

## 19

### *Memehuaaji huatidsehe tojaridsajaro*

<sup>1</sup> Nadsapi Babironia diji tehe jicani nattinipi memehuaaji madija huapima attideni mohui tehe omittajaro. Pohuadeni attipa:

—¡Areroia, ia Medsede Diopa bica tahi! Puhuapa tossiejehe jinede.

Ima huapimadsa deni tojajari. Pihuana denima dacorahi ojarijari.

<sup>2</sup> Diopa pajissehedsa ima nattome inadsapi Pohuajine pajiranissa tajaro.

Babironiaccá huananehe dsama huapimadsa dsapa taridsajaro manaconipi ponidsa ssonarinitohui.

Ponijine Diocca medse emenedeni toccaridsajari manaconedeni naco najidsohue oppina tajarodsa Dio inajicajaro –quinajari.

<sup>3</sup> Nadsapa huati toquinapomajari:

—¡Areroia, ia Medsede Diopa bica tahi!

Babironiapi diji tehe jicaraha essení toccamacosanipi nebo-jeranitohui –quinajari.

<sup>4</sup> Nadsapa cacahuadedeni 24 quinajari, camittehe cajimanajari 4 quinajarideni tedseje Diocca huihuittari bicabote tadsajanima pohuadeni baccohují domodeni pona nadsa Diodsa huatidsemanajari. Pohuadeni attipa:

—¡Pajissa nema nana! ¡Areroia, ia Medsede Diopa bica tahi! –quinajari.

<sup>5</sup> Nadsapa Diocca huihuittari bicabote cahit-tarinihuají tohuatti omittajaropi ajima najaro:

—Huapima Pohuadsa medse tiquejenajaro icca Diodsa jiri jiri tiquinají.

Huapima Pohuadsa tidsepedeni ijijaro,

Pohua noppine cappinaqquri tiquinajaro, ají deni tiquejenajarodeni, ajimani tiquejenajarodeni naqui

Diodsa jiri jiri tiquinají –najari.

*Edede Bedi cacajirehicca ejete*

<sup>6</sup> Nadsapi memehuajicca madija huapima attideni mohuini omittaneje bica tajaro, pina hueni ssahaha canajarossa najaro. Mohuini onihi

naqui pina ttotorode mohuini dacorajarossa najaro. Attidenipa:

—¡Areroia, Ia Medsede Dio dacorabotepa deni tojahi!

Jidapana huapima ecahuabaqquihijine pocca cacahuehe bacco tani.

<sup>7</sup> ¡Etidsena, etidseri nana! Diodsa: “Deni tijani, bica tinani” inana.

Jidapanana Edede Bedi cacajirehicca huada bacco tani.

Pocca amoneje tojanijinepi najorani.

(Najaropi pocca madija najoramanajari, pohuadsa madimanahijine.)

<sup>8</sup> Etero huedsadsa najoranijinepi ponidsa etero onini lino bica tajaro, nopo, dsibehi tajaro da inajaro.

Najaro etero bicanicca imapi Diocca madija toquejenajarideni bodideni inahirebaqquidsa Pohuadsa madimanahissa tajari -quinajari.

<sup>9</sup> Nadsapa Diocca dodosse ohuadsa huati tajari: —Dsodo taji: Edede Bedi Jesopa pocca madijadsa huahua najari, pocca cajicajicca jipaqquiedsa jai tojedsimahijine. Jai tojedsimajaridenipa huatidsehe imeni cajimanahitohui -najari. Nadsapa denima huati tajari: —Aji huati huati onajaropi Dio Atti pajissacca -najari.

<sup>10</sup> Nadsapi Diocca dodosse baccohuaji opitodsa ohuitta nadsa pohuadsa ohuatidsenijineraha ohuadsa huati tajari: —Ohuadsa nema tejeraji. Ohua naqui Diocca medse ojani. Pina tia timecotedeni tedseje Jesocristo tahimaridsa

disseraqquri tiquinajarossa onani. Diodsara tetidseji –najari.

Aji Jesocristo tahimari bicabotepi Dio Pohua Atti cacomeraqquri najaridenidsa inanadsana ehecomeramana najonajaropaji.

*Bojo nopohuidsa huittarijaricca ima*

<sup>11</sup> Nadsapi qqui onaneje meme tohuabadsa bojo nopohui ahuatojari. Najari bojodsa huittarijaripa Pajissehe Jinede. Pohuapa maidsera tajari. Dsama ecahuadsa, jadsire inanadsa naqui pohuajine pajiranissa tajaro. <sup>12</sup> Pohua nocco dsibehi tajaro. Pina dsippo jororonissa najaro. Pohua tatidsapa tamine tatidenicca huapi taha tassaqquidsa huittarijari. Pohua oni dsodo nani cajiraha pohua motta nahato tahi ojari najari. <sup>13</sup> Pocca eteropi tohuemenedsa ibedsippani macco tajaro huedsajari. Pohua onipa Dio Atti. <sup>14</sup> Pocca madija memehujicca jajadsirededeni pohua natti jai tojamissajari. Poccadeni etero onini lino bica tajaro, nopo, obero tajaro huedsamanadsa bojo nopohuidsa huihuittariri naridsajari. <sup>15</sup> Pohua ajaridsa qqunenajaropi pina massito cajadsire-qquimerajarossa najaro. Najarodsa dsama huapimacca madija inajidsoridsabaqquihijine. Dsama huapimacca tamine dacorabote tojadsapa pohua atti dacoradsa madija dosse dosse nahitohui. Pohuajinepa Dio Dacorabotecca huadie tojani qqui toquinahitohui. Pohuapa Diodsa iboqquri najarideni ttai idsanacossabaqquidsa mere huajahissa tahitohui. Pina uva ppejene toccahijine ttai ttai quinajarissa nahitohui. <sup>16</sup> Pocca eterodsa, pohua panaccodsa

naqui dsodo nanicca imapi: —Tamine huapi taraha Jesona tamine deni tojahi ojarihi. Medse cajimanahi huapi taraha Jesona ia Medsede deni tojahi ojarihi –najaro dsodo nani.

*Bojo nopohuidsa huittarijaripa deni tojajari*

<sup>17</sup> Nadsapa qq̄ui onanaja Diocca dodosse ma-jidsa huarihi qq̄ui onajari. Pohuapa meme abari banicca jipagq̄ui najari meme napicossanidsa jahiridsajaridenidsa jadsirema huahua najari: — ¡Nija, jai tijajonaji! Diocca jipagq̄ue imeni-botedsa tijipamananijine tiqueriq̄quimanaji –najari. <sup>18</sup> —Tijipamananijinepi tamine imedeni, soldadodenicca tamine imedeni, jadsirecca dacoraq̄q̄ui najari imedeni, bojo imedeni, bojodsa huihuittaride imedeni, madijacca dodosse toquejena-jarajari imedeni, madijacca dodosse toquejenajari imedeni, ajamani toquejenajari imedeni, deni toquejenajari imedeni naco tijipamananitoahui –najari.

<sup>19</sup> Nadsapa qq̄ui onanaja bani siri jidsabote, dsama huapimacca taminedeni, poccadeni soldadodenima jadsire inanamananijine queriq̄quih̄i qq̄ui onabaq̄quijari. Aja bojo nopohuidsa huittarijaridsa ssonarimanahijine, pocca soldadodenidsa naco ssonarimanahijine najoramanaha domo huajari. <sup>20</sup> Cahadiredsapa bojo nopohuidsa huittarijarina pocca madija tedseje bani siri jidsabote dama quinajari. Bani siri ohuaha maidsehe mamaride naco dama quinajari. Najariipa bani siri jidsabote tocattahihuaji canahatori canapojari. Najari naco madija icamaidsabaq̄quidsapa bani siri

jidsabote janodsa inajanoridsapojari. Najari pohuajine naco bani siri jidsabote corimedsa huatidsemanapojari. Nadsapa najari bani sirideni pamahapa camittagquiri naraha coridsa imeni azufre jororo cananidsa cororo todsippajari. <sup>21</sup> Nadsapa bojodsa huittarijari pohua ajaricca massito cajadsireqquimera najarodsa bani siricca soldadodeni inajicajari. Nadsapa meme abari madija imedeni jipamanadsa accaraqquiri najari.

## 20

### *Huajano 1,000 nahicca ima*

<sup>1</sup> Nadsapa qqui onapomanaja Diocca dodosse nami odini huaji tanicca pipicoma ccaronajari. Cadena imehibote naco pohua dsepedsa dsojo inaronajari. <sup>2</sup> Najari Diocca dodossepa huama imehibote dama inadsa jore inaqquijari, huajano 1,000 (mil) naha ccaridsa-jarahijine. Najari huama imehibotepa maittaccadsama pina maccassa naha ahuatopojari. (Najarina Adana Ebadeni icamaidsabaqquijojari.) Pohua onipa Satana, Diocca huadi najari. <sup>3</sup> Nadsapa nami odini huaji tanihuaji coro idsimadsa noccobiji ecossanissa tajaro, qqvena-jarahijine. Noccobiji huapihuaji modsassa najarodsa nepi inacossajaro. Nadsapa huajano 1,000 naha dsama huapimacca madija icamaidsabaqqui-jarahijine. Huajano 1,000 naha jicadsana tappa inadsapa huada pamehe ccaridsadsa madijadsa maidsa maidsa naridsapomacchahitohui.

<sup>4</sup> Qqui onanaja taminedenicca huihuittaridsa jassi tariridsajari qqui onabaqquijari. Pohnadenipa ima icattemamananijine Diocca dossehe cajimanajari. Nahidsa naco madija mattodeni ca ca tojidsamaneri napojarideni qqui onabaqquijari. Najaridenipa Jesocristo tahimari nahatoqquiri najarideni Dio Atti ecomera-ridsamanajarojine inajicabaqquimanapojari. Pohnadenipa bani siri jidsabotedsa, pohua corimedsa naco huahuatidsemana najarade. Bani siricca nanajano assaridenidsa, dsepedenidsa cajimana-jarajari. Najarideni nahatonimanahi qqui onabaqquijari. Nadsapa huajano 1,000 naha Cristo tedseje dsama huapima dossede toquejenaridsajari. <sup>5</sup> Ajjaropi madija tahide nahatoni-manapojaridenicca ima. Naraha tojicapojarideni motapa nahatonimana-jaraccahitohui. Huajano 1,000 naha jicadsana nahatonimanahitohui. <sup>6</sup> Madija nahatoni-manapojaridenidsa Diocca biquehe tojajaro. Pohnadeni bodi ssiajaqquiri, huireqquri najari. Dsoqqehe dsotodecca pohnadenidsa nohueranitohui. (Najaropi najidsohue jiquejeranicca tonahanamanadsanapojarahitohui.) Nadsapa Diodsa, Cristodsa dsepedeni ijimanahitohui. Diodsa huahuati toqquimade toquejena, dada toqquimade toquejena nahitohui. Huajano 1,000 naha Cristo tedseje dsama huapima dossede toquejenaridsahitohui.

*Diocca huadi Satana nanajidso tojahicca ima*

7 Satanapa huajano 1,000 naha odi huaji tani bodidsa huedsaraha najari huajano jicadsapa tappa tadsa qquenahitohui. 8 Qquenadsapa dsama onihi onihidsa madiridsamanajarideni huapima ahuajicca, ahuajicca icamaidsa-baqquiridsahitohui. Najaridenidsa: Cohuajicca madijadeni, Macocahuajicca madijadeni quiquinanajari. Najarideni Satana inequeriqquibaquijari, jadsire inanamananijine. Huapi taja najari. Pina ssiqui potera tajaro hua inanijine ssamo tajarossa quinajari. 9 Nadsapa jadsiretohui quinajarideni jahijonana canajari. Dsama nemanehedsa ijimanajari. Diocca madija madimanahihuaji ijihuajani-manajari. Diocca cattaniji pocca odsa panani bicabote denihuajina cottaja-huajanimanaha jica najari. Naraha jororoni ppocorabote Dio dosse inaronajaro. Jadsiretohui jahijonajarideni diji tocanirea jicajari. 10 Diocca huadi Satana madijadsa maidsa maidsa naridsapojari manaconipa coridsa imeni azufre jororo cananihuaji coro todsippajari. Nahihuajipa bani siri jidsabote, bani siri ohuaha maidsehe mamaride tedseje cororo todsippapojari. Nahidsapa dsome, ssiaja, dsome, ssiaja ocasserani ahuamana-dsanapohuitohui.

*Diocca huihuittari bicabote nopo tocanajaro-dsa ima cattemade tojajari*

11 Nadsapa qqui onanaja pocca huihuittari bicabote nopo tocanajarodsa Dio huittarihi qqui onajari. Nahidsa huittaridsa pohua

tedsejemapi meme tohuatora-ra amossi, nami tohuatora-ra amossi nadsapi nohuerade. 12-13 Ocattoma cananaja dsoqquemana-pojarideni Dio tedsejema domodeni huajari. Nahihuajipa deni toquejenajarideni domo hua, cappiramanajarideni domo hua najari. Aja passodsa je tocanirejarideni, dsamadsa jicajarideni, dsoqquemana-pojarideni huapima Diocca huihuittari bicabote tadsajanima domodeni huajari. Nadsapa dsoqquemana-pojaridenicca ima papeodsa dsodo napojaro itaboridsajaro. Aji pohuadenijine ima bicani inaridsamanajaro, ima tabaccora tanicca inaridsamanajaro naqui papeodsa dsodo naridsajarodsa ima cattemade tojajari. Nadsapi pina pohuadeni ima inaridsamanajarossa nehe manaconi pohuadenidsa inanajaro. Papeo onihi naqui itabojaro. Najaro papeopi madija camittehe cajimana-dsanapohuijinecca. 14-15 Madija pohuadeni oni camittehe cajimana-dsanapohuijinecca papeodsa nohueradsapa coridsa jororo cananidsa hua todsippajari. Dsoqquehe coridsa imeni jororo cananihuaji coro todsippajaro. Dsoqquehecca cacahuehe naqui coro todsippajaro. Najaro coridsa imeni jororo canajarocca imapi dsoqquehe dsotodecca.

## 21

### *Meme dsati, nami dsati najaro tahimarini*

<sup>1</sup> Nadsapi qqui onapomaneje meme dsati, nami dsati qqui onajaro. Aji tahidecca meme, nami najaropi amossi najaro. Passo imeni naqui

amosi najaro. <sup>2</sup> Dio pocca odsa panani bicabote Jerosare dsati qq̄ui onade. Dio Pohua tedsejema memehuaĵi ccaronade. Jerosarepi pina amoneje maqq̄ui cajinijine najorajarossa najaro, bicaridsaponi nade. <sup>3</sup> Nadsapi memehuaĵi Deni tojahicca huihuittari bicabote cahittarinihuaĵi tohuatti mohui tehe omittajaro: —Jidapapa Dio madijadsa madihi. Pohuadenidsa madi-dsanapohuitohui. Madija huapima Diocca cacahuehedsa toquejenahitohui. Diopa pohuadeni Cacahuade tojadsanapohuitohui. <sup>4</sup> Pohuapa inocco ppajani sse inanitohui, denima oĵi inejeranijine. Iadsa Dio madidsapa dsoqq̄uehe nohue, oĵe nohue, ettima oĵi oĵi inajaro nohue, coma inajaro naqui nohueranitohui. Aĵi ima huapima namidsa caji tapojaropi jicanitohui -nade.

<sup>5</sup> Nadsapa aja Deni tojahicca huihuittaridsa huittari canajari Attipa: —Ohuapi huapima dsati onanaridsahi -nade. Pohua Atti onihi naqui: —Aĵijaro ima dsodo taji. Aĵijaro imapi pajissa. Imapi pina aĵijarossa nehe tojanitohui -nade. <sup>6</sup> Nadsapa ohuadsa huati tajarari: —Aĵijaro ima huati onajaropi tojanissa tehe jicani. Ohuapi Ohua. Aĵijaro dsama nahatopo-jeradsama omadipojaro. Nidsa dso-tode aĵijaro dsama jicaraĥa Ohuapi omadi-dsanaponitohui. Madija bacco dsaridsapa passo camittehecca qq̄uenajaro dse nahijine pohuadsa da onanitohui. Pohuadsa: Manaconi, onejeranitohui. <sup>7</sup> Aĵi occa dacorehema timadimanadsa Ohuadsa jehe tiquinajaro tinebomanajeradsapi jidacca huati huati onapojaro huapima tiadenidsa tojaridsanitohui. Ohuapi ticcadeni

Dio ojanitohui. Tiadenipi occa ejedeni tiquejenanitohui. <sup>8</sup> Naraha Ohuadsa toquejenarajaridenipa najidsohue cajimanahitohui. Aja madija: “Jesocristopa ohua Idinide” quinahijine huatide cappinaqquiri najari, madija Jesocristodsa pajissa quina-jarajarideni, ima tabacora taniccadsa disseraqquri najarideni, madija pohua tesse nanadsoqquede dissera tajari najidsohue cajimanahitohui. Aja huananehecca disseraqquri najarideni, dsoppinejedeni, siba nahatonidsa huahuatidsemana najarideni, ma- maidsadedeni naco najidsohue cajimanahitohui. Najarideni huapimapa coridsa imeni azufre jororo cananihuaji hua todsippahitohui. Najaropi dsoqqehe dsotodecca -nade. (Nanidsapi najidsohue jiquejeranicca tonahanamandasanapohuitohui.)

### *Jerosare dsati tahimarini*

<sup>9</sup> Nadsapa Diocca dodosse tabaqqi memehujicca <sup>7</sup> quinaha tasaodsa najidsohue oppina tanicca cajiridsamanapojari ojaría ccajonadsa ohuadsa huati tajari: —Aji ticcajonaji, Edede Bedicca amoneje tojanijine najorajaro tia qqui onanana -nade.

<sup>10</sup> Nadsapi Dio Corimejine ima ohuadsa ahuateo tajaro. Pina occa huadassa nadsa qqui onajaro. Ocattoma cananeje Diocca dodosse ssono dequeranihuaji ohua tohuaccajari. Nanihuaji ohuadsa ahuateo inanajaro. Memehujaji Dio pocca odsa panani bicabote Jerosare Dio Pohua tedsejema ccaronani qqui onade. <sup>11</sup> Najaro odsa pananipi Dio pocca deni tojehe, pohua

ssiejenejine dsibehi tajaro. Najaro dsibehinipi pina siba huatini ccara tanicca diamante dsibehinissa najaro. Ssiaja tajaro pina cristaossa najaro. <sup>12</sup> Odsa panani huapihuaajipi siba hua nahuajanini dequerajaro. Motarema ccahuajanijaro. Noccobiji 12 nehe cajijaro. Najaro noccobijidsa Diocca dodosse tabaqqui ojari ojari naha huahueri naridsajari. Noccobijidsa onideni dsodo naridsajaropi jodiodenicca idi ojaria oni Isaraeri bedi 12 quinajari onideni. <sup>13</sup> Maji ccajonahihuaajipi noccobiji 3 nehe cajijaro. Maji toccahihuaaji naqui noccobiji 3 nehe cajijaro. Arobenihuaaji naqui noccobiji 3 nehe cajijaro. Arobeni onihihuaaji naqui noccobiji 3 nehe cajijaro. <sup>14</sup> Odsa pananicca siba hua nahuajanijaro tocadacorade siba imeni 12 nehe cajijaro. Najaro siba 12 najarodsapi Edede Bedi Jeso pohua huati-madedeni 12 quinajari onideni dsodo naridsani qqui onade.

<sup>15</sup> Aja Diocca dodosse ohuadsa huati tariparipa nanattome orocca dsibehi tajaro dsojo inajari. Najarodsas odsa panani, noccobiji, hua nahuajanini naqui nattomede tojaridsajari.

<sup>16</sup> Nadsama odsa panani dequeranihuaajipi pina bijini matanihuajissa caniqquimerajaro. Diocca dodosse odsa panani nattome inadsapi 2 mil, 200 kilometros (2,200) cajijaro. Dequeranihuaaji najarossa, bijini matanihuaji najarossa, tetepihuaaji najarossa caniqquimerajaro. <sup>17</sup> Nadsapi hua nahuajanini nattome inadsa sibanipi 65 metros. Najaro nanattomepi ajijaro nami nanattomedsa Diocca dodosse nattome inajaro.

<sup>18</sup> Odsa panani huapihuaajicca hua nahuajani-

jaropi diamantedsa nahatojaro. Odsa pananipi oro poniradsa canahatojaro. Najaro oropi pina jojo ssiaja tajarissa najaro, tocassiejeqquimera najaro. <sup>19</sup> Aji odsa pananicca hua nahuajani-jaro tocadacorate siba imeni 12 quinajarodsapi siba bedeni dsibehini bicabote nepi naridsajaro. Siba bedeni janonipi onihi onihi naridsajaro. Oninipi ajima najaro: Tahidecca siba imenidsapi diamante dsibehi tajaro ijiridsajaro. Dsotodeccadsapi sapiro sohue tajaro ijiridsajaro. Onihi 3'ccadsapi acata macconi janoni cajini ijiridsajaro. Onihi 4'ccadsapi esemeraoda sohueni ssiaja tajaro ijiridsajaro. <sup>20</sup> Onihi 5'ccadsapi onise sohue tajaro noponidsa quejemajaro ijiridsajaro. 6'ccadsapi robi macco tajaro ijiridsajaro. 7'ccadsapi crisolito huesse tajaro ijiridsajaro. 8'ccadsapi berilo macconi, sohueni, huesseni ijiridsajaro. 9'ccadsapi topasio macco najaro ijiridsajaro. 10'ccadsapi crisoprasa sohueni huesse tajaro ijiridsajaro. 11'ccadsapi jasinto sohueni ijiridsajaro. 12'ccadsapi amatista sohueni idira tajaro ijiridsajaro. <sup>21</sup> Aji noccobiji 12 najaropi perla noponi dsibehi tajaro 12 nehe huacossaridsajaro. Perla ojariepi noccobijidsa ojari ojari naridsajaro. Odsa pananicca jahui huapimapi dsibehini oro ponira ijijaro, tocassiejeqquimera najaro.

<sup>22</sup> Najaro odsa pananidsapi Diodsa dada toqquima odsa qqui onejerani. Dio Atti mamari naqui nohuerajaro. Naraha ia Medsede Dio Dacorabotena nahidsa madijari. Edede Bedi Jeso naco nahidsa madijari. Iqueriqquidsa etidseni-jinepi pohuadeni pamahadsana ehetidse nani-

jine. <sup>23</sup> Diocca odsa pananidsapa maji nohue, abadsico ssiejene nohuerahi. Ssiaja taridsajaropi Dio pocca deni tojehe, Pohua ssiejenena paji. Edede Bedi naco pina jojororossa najari, pohua ssiejene ssiaja taridsajari. <sup>24</sup> Aji dsama onihi onihi naridsajarocca madija huapimapa najaro odsa panani ssiajanidsa madimanahitohui. Dsama onihi onihicca tamededeni naco poccadeni biquehe deni tojanicca Diodsa da quinanjine najaro odsa pananihuaji dsojo idsimamananitohui. <sup>25</sup> Noccobiji tohuabehe nema dsanaponitohui. Dsomepi nohuerani. Ssiaja ponira nema dsanaponitohui. <sup>26</sup> Dsama huapimacca madija poccadeni biquehe deni tojanicca Diodsa da quinanitohui. Poccadeni dsamacca biquehe naqui da quinanitohui. <sup>27</sup> Najaro odsa pananihuajipi Dio jipera tahicca nohueranitohui. Madija imasiri totonanadedenipa jahidsimajarahitohui. Madija mamaisadedeni naco jahidsimajarahitohui. Aja Edede Bedicca papeo camittehe cajimana-dsanapohuijineccadsa onideni dsodo naridsajaridenira jahidsimahi ojarhitohui.

## 22

<sup>1</sup> Nadsapa Diocca dodosse hueni bicahi ohua qqui tonanajaripa passo ssahua tajaro, tocassiejeqquimera najaro. Najaropi passo camittehecca. Dio, Edede Bedi pohuadeni pamahacca huihuittari cahittarinidsa passo qquenajaropi hueni tocajari. <sup>2</sup> Najari huenipa odsa pananica jahui nocconi motta tohuaccajari. Ahua

camittehecca hueni inididsa ahuaji hua, jippe-huaji hua najari. Abadsico cajari cajari bobono najari. Huajano ojariadsa bono cajijaripa 12 najari. Najari ahua eppepa dsama huapimacca madija nomiqquiri naha madimanasanapohuijine. <sup>3</sup> Najaro odsa pananihuajipi tabaccorehe nohue, Diocca najidsohue naqui nohueranitohui. Nanidsapi Dio, Edede Bedi pohuadeni pamahacca huihuittari cahittarinitohui. Diocca medse huapima pohuadeni pamahadsa huatidsemanahitohui, jiri jiri quiquinanahitohui. <sup>4</sup> Dio Pohua assire qqui quinahitohui. Pohua oni pocca medse huapima assaridenidsa dsodo naridsanitohui. Najaro imapi Dio Pohua pocca toquejenajari. <sup>5</sup> Nanidsapi dsome nohueranitohui. Nahihuaji madija madimanasaridenipa jojororo tohui, maji ssiejene tohui quina-jarahitohui. Ia Medsede Diona huapimadsa ssiaja inanaridsanitohui. Nadsapa Dio pocca medsedeni huapima dossede toquejenadsanapohuitohui.

*Jesocristo ccanipomahicca imapi huajira tani*

<sup>6</sup> Nadsapa Diocca dodosse ohuadsa huati tapomajari: —Ajijaro imapi pajissa. Imapi pina ajijarossa nehe tojanitohui. Ia Medsede Diopa Pohua Atti cacomeraqquiri najaridenidsa Pohua Atti inanaridsapojaro. Najari Diopa ohua dosse naronajari. Ohuapi pocca dodosse, pocca medsedenidsa pohuadeni tedsejemacca ima tojabote nanicca ahuato onananijine occaronajaro —nade ohuadsa.

<sup>7</sup> Ia Medsede Jeso attipa: —Occanibote nani –najari. —Diocca ima itedsejemacca ajijaro papeodsa dsodo nanidsa ibora tajaripa occa biquehe pohuadsa onananitohui –nade.

<sup>8</sup> Ohuapi Huano, aji jidapanacca, itedsejemacca Diojine huapima ohuadsa ahuato inanadsa omittajaro, qqui onajaro. Najaro jicadsapi Diocca dodosse ohuadsa huati huati tajari baccohuaji opitodsa ohuittajaro, pohuadsa ohuatidsenijine. <sup>9</sup> Naraha pohua attipa: —Nema tejeraji. Ohuapi Diocca medse ojani. Pina tiassa, pina timecotedeni Dio Atti cacomeraququiri najaridenissa onajaro. Aja madija huapima ajijaro ima papeo dsodo nanidsa iboraququiri najaridenissa onehe Diocca medse ojani. Diodsara tetidseji –nade.

<sup>10</sup> Pohua atti onihi naqui: —Diocca ima ajijaro papeodsa dsodo najaropi madija hua hua quinahijine ahuatoranidsa tecahua tejeraji. Ajijaro ima dsodo nanicca tojanijinepi huajira tani.

<sup>11</sup> Najaro ima tohuajiradsapi madija tabaccora tajari, bodi oba tajari naco poccadeni tabaccorehe inanamanaccanijine. Apaja, bodideni cacajiqquimerahijine pajiramana-jarahi. Naraha madija bica tajari, bodi huire tajari naco ima bicani inanamana-dsanaponijine bica tani –nade Diocca dodosse ohuadsa.

<sup>12</sup> Ia Medsede Jeso attipa: —Jehe, occanibote nani. Ima bicani inanaridsa-manajarodenipa najarossa nehe pohuadenidsa da onaridsanitohui. Naraha ima tabaccora tanicca inanaridsa-manajarodenipa najarossa nehe pohuadenidsa da onaridsanitohui. <sup>13</sup> Ohuapi ohua. Ajijaro

dsama nahatopo-jeradsama omadipojaro. Nidsa dsotode ajijaro dsama jicaraha ohuapi omadi-dsanaponitohui –nade Jeso.

<sup>14</sup> Nadsapa madija pina poccadeni etero ssahua quinajarossa nadsa bodideni tohuirerid-sadsapa Dio pocca biquehe pohuadenidsa inaridsanitohui. Najaridenipa ahua bono camittehecca jipamanahi bica tahi. Diocca odsa pananicca noccobijidsa jai tojedsimahi naco bica tahi. <sup>15</sup> Naraha aja madija Jesocristodsa pajissa quina-jarajarideni, dsoppineje doridsa disseraqquri najarideni, huananehedsa disseraqquri najarideni, ijinedeni ahuamanajarideni, siba nahatonidsa huahuatidsemana najarideni, maidsehedsa disseraqquri najarideni, pohua tesse mamaisadedeni, najarideni huapimapa Diocca odsa pananidsa jai tojedsima-jarahitohui.

<sup>16</sup> —Ohuapi Jeso, otahimaridsa titiqueriqquiridsamana najarodenidsa occa dodosse memehuaajicca dosse onaronajari, najaro ima nemaneha timittamananijine –nade. —Ohuapi maittaccadsama Isaraeri potemahidenicca tamine Dabi Potemahi ojani. Ohuapi pina dsidsidsamassacca abadsico bedi ssiaja tocanajarissa onajaro –nade Jeso.

<sup>17</sup> —Nija, ticcajonaji –quinahi Dio Corime, Ede Bedicca amoneje tadsajani. (Najaro amonejicca imapi Jesocristodsa ihiqueriqqui najarocca ima.) Madija ajijaro ima mittamanajarideni naco: —Jehe, ticcajonaji –quinana. Passotohui bacco dsarijari dsede jipa tadsapa ccajonana, passo camittehecca manaconi jirehe dse nahijine.

<sup>18</sup> Diojine ahuatojaro itedsejemacca imapi ajijaro papeodsa dsodo nani mittamanajaridenidsa ohuatti ajima onajaro: Madijapa ajijaro imadsa ima onihi inaharini oppina tani. Ima onihi tonaharidedsapa Dio pohuadsa ima oppina tanicca inassonarinitohui. Ajijaro papeodsa dsodo nanicca ima oppina tanicca pohuadsa tojanitohui.

<sup>19</sup> Nadsama madija ohuaha itedsejemacca ima ajijaro papeodsa dsodo nanicca mota inebodsapi manaco Dio pohuadsa ahua bono camittehecca eccocchuitohui. Odsa panani Jerosare naqui pohuadsa eccocconitohui.

<sup>20</sup> Ajijaro ima huapimapi Jesocristo huati tajaricca. Iadsa pohua attipa: —Pajissa, occaninijine huajira tani —nade.

Nadsapi ia etti: —Pajissa nema nana. Ia Medsede Jeso ticcaniji —inajaro.

<sup>21</sup> Ia Medsede Jesocristo tiadeni huapimadsa ima bicani inanana, onajaro. Pajissa nema nana. Epejeni.

**El Nuevo Testamento en el idioma Culina  
(mádija) del Perú**

**Kulina: El Nuevo Testamento en el idioma Culina  
(mádija) del Perú New Testament**

copyright © 2014 Wycliffe Bible Translators, Inc.

Language: Culina (Kulina)

Contributor: Wycliffe Bible Translators, Inc.

All rights reserved.

2020-11-16

---

PDF generated using Haiola and XeLaTeX on 21 Feb 2024 from source  
files dated 29 Jan 2022

4c7c82dd-1f0f-5341-b6e6-26970c27fee2